

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे अष्टमः प्रश्नः

**Notes:**

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site “[www.vedavms.in](http://www.vedavms.in)”

Table of Contents

1 कृष्ण यजुर्वेदीय तैत्तिरिय संहितायां पद पाठे

प्रथमं काण्डं ..... 3

1.8 प्रथमकाण्डे अष्टमः प्रश्नः – राजसूयः.....3

ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

## 1 कृष्ण यजुर्वेदीय तैत्तिरिय संहितायां पद पाठे प्रथमं

### काण्डं

#### 1.8 प्रथमकाण्डे अष्टमः प्रश्नः – राजसूयः

##### 1.8.1.1

अनु॒म॒त्यै॑ पु॒रो॒डा॒श॒-म॒ष्टा॒क॒पा॒लं॑ निर्व॒प॒ति॑ धे॒नु॒ र्दक्षि॑णा॒ये प्र॒त्य॒ञ्चः॑  
शं॒या॒या॒ अ॒व॒शी॒य॒न्ते॒ तं॒ नैर्ऋ॒तमे॑क-क॒पा॒लं कृ॒ष्णं वा॒सः॑ कृ॒ष्णा॒तू॒षं  
दक्षि॑णा॒ वी॒हि॒ स्वा॒हाऽऽहु॑तिं जुषा॒ण ए॒ष ते॑ निर्ऋ॒ते भा॒गो भू॑ते  
ह॒वि॒ष्म॒त्य॒सि॒ मु॒ञ्चे॑म॒म॒ ह॒सः॒ स्वा॒हा॒ नमो॑ य इ॒दं च॒का॒राऽऽदि॒त्यं  
च॒रुं॒ निर्व॒प॒ति॑ व॒रो दक्षि॑णा ऽऽ॒ना॒वै॒ष्ण॒व-मे॑काद॒श॒क॒पा॒लं  
वा॒म॒नो॒ व॒ही॒ दक्षि॑णा ऽ॒ग्नी॒षो॒मी॒य - [ ] 1

**1.8.1.1 (Padam)**

अनु॒म॒त्या इत्य॑नु॒-म॒त्यै । पु॒रो॒डा॒शम् । अ॒ष्टा॒क॒पा॒लमि॒त्य॒ष्टा-क॒पा॒लम् ।  
 नि॒रि॒ति । व॒प॒ति । धे॒नुः । दक्षि॑णा । ये । प्र॒त्य॒ञ्चः । श॒म्या॒याः ।  
 अ॒व॒शी॒यन्त॑ इत्य॑व – शी॒यन्ते॑ । तम् । नैर्॒ऋ॒तमि॒ति नैः – ऋ॒तम् ।  
 ए॒क॒क॒पा॒लमि॒त्ये॒क – क॒पा॒लम् । कृ॒ष्णम् । वा॒सः । कृ॒ष्णतू॒षमि॒ति  
 कृ॒ष्ण-तू॒षम् । दक्षि॑णा । वी॒ति । इ॒हि । स्वा॒हा ।  
 आ॒हु॒तिमि॒त्या-हु॒तिम् । जु॒षा॒णः । ए॒षः । ते । नि॒र्ऋ॒त इति॑  
 निः-ऋ॒ते । भा॒गः । भू॒ते । ह॒विष्म॑ती । अ॒सि । मु॒ञ्च । इ॒मम् ।  
 अ॒ह॒सः । स्वा॒हा । न॒मः । यः । इ॒दम् । च॒कार॑ । आ॒दि॒त्यम् ।  
 च॒रुम् । नि॒रि॒ति । व॒प॒ति । व॒रः । दक्षि॑णा ।  
 आ॒ग्ना॒वैष्ण॑वमि॒त्याग्ना॑ – वैष्ण॑वम् ।  
 ए॒का॒द॒श॒क॒पा॒लमि॒त्ये॒का॒द॒श – क॒पा॒लम् । वा॒म॒नः । व॒ही । दक्षि॑णा ।  
 अ॒ग्नी॒षो॒मी॒यमि॒त्यग्नी॑ – सो॒मी॒यम् । 1 (50)

**1.8.1.2**

मे॒काद॑श॒ क॒पा॒ल॒ꣳ हिर॑ण्यं दक्षि॑णै-न्द्रमे॒काद॑श॒क॒पा॒ल॒-मृ॒ष॒भो॒ व॒ही  
दक्षि॑णा ऽऽग्ने॒य॒म॒ष्टा॒क॒पा॒ल॒मै॒न्द्रं दध्यृ॑ष॒भो॒ व॒ही दक्षि॑णैन्द्रा॒ग्नं  
द्वा॒द॒श॒क॒पा॒लं वै॒श्वदे॑वं चरुं प्रथ॑मजो व॒थ्सो॒ दक्षि॑णा सौम्यꣳ  
श्या॒मा॒कं चरुं वा॒सो॒ दक्षि॑णा सर॒स्वत्यै॒ चरुꣳ सर॑स्वते चरुं मि॒थुनौ॑  
गावौ॑ दक्षि॑णा । 2

**1.8.1.2 (Padam)**

ए॒का॒द॒श॒क॒पा॒ल॒मि॒त्ये॒का॒द॒श॒-क॒पा॒ल॒म् । हि॒र॒ण्य॒म् । दक्षि॑णा । ऐ॒न्द्रम् ।  
ए॒का॒द॒श॒क॒पा॒ल॒मि॒त्ये॒का॒द॒श॒-क॒पा॒ल॒म् । ऋ॒ष॒भः । व॒ही । दक्षि॑णा ।  
आ॒ग्ने॒य॒म् । अ॒ष्टा॒क॒पा॒ल॒मि॒त्य॒ष्टा॒-क॒पा॒ल॒म् । ऐ॒न्द्रम् । दधि॑ । ऋ॒ष॒भः ।  
व॒ही । दक्षि॑णा । ऐ॒न्द्रा॒ग्न॒मि॒त्यै॒न्द्र॑ - अ॒ग्न॒म् । द्वा॒द॒श॒क॒पा॒ल॒मि॒ति  
द्वा॒द॒श॒-क॒पा॒ल॒म् । वै॒श्वदे॑वमि॒ति॑ वै॒श्व॒-दे॒व॒म् । च॒रुम् । प्र॒थ॒म॒ज  
इति॑ प्रथ॑म - जः । व॒थ्सः । दक्षि॑णा । सौम्य॑म् । श्या॒मा॒क॒म् ।  
च॒रुम् । वा॒सः । दक्षि॑णा । सर॒स्वत्यै॒ । च॒रुम् । सर॑स्वते । च॒रुम् ।

मि॒थु॒नौ । गा॒वौ । दक्षि॑णा । 2 (34)

(अ॒ग्नी॒षो॒मीयं॑-चतु॑स्त्रि॒ंशच्च॑) (A1)

### 1.8.2.1

आ॒ग्ने॒यम॑ष्टाक॒पालं॑ निर्व॑पति सौ॒म्यं च॒रुं सा॒वि॒त्रं-द्वा॒द॒शक॑पालं  
सा॒र॒स्व॒तं च॒रुं पौ॒ष्णं च॒रुं मा॒रु॒तं स॒प्तक॑पालं वै॒श्वदे॒वीमा॑मि॒क्षां  
द्या॒वापृ॑थि॒व्य-मे॒कक॑पालं । 3

### 1.8.2.1 (Padam)

आ॒ग्ने॒यम् । अ॒ष्टाक॑पालमि॒त्यष्टा॑-क॒पालम् । निरि॑ति । व॒पति॑ ।  
सौ॒म्यम् । च॒रुम् । सा॒वि॒त्रम् । द्वा॒द॒शक॑पालमि॒ति द्वा॒द॒श-क॑पालम् ।  
सा॒र॒स्व॒तम् । च॒रुम् । पौ॒ष्णम् । च॒रुम् । मा॒रु॒तम् । स॒प्तक॑पालमि॒ति  
स॒प्त -क॑पालम् । वै॒श्वदे॒वीमि॒ति वै॒श्व - दे॒वीम् । आ॒मि॒क्षां ।  
द्या॒वापृ॑थि॒व्यमि॒ति द्या॒वा-पृ॑थि॒व्यम् । ए॒कक॑पालमि॒त्येक॑-क॒पालम् ।

3 (18) (आ॒ग्ने॒यं सौ॒म्यं मा॒रु॒त-म॑ष्टाद॒श) (A2)

### 1.8.3.1

ऐ॒न्द्रा॒ग्न-मे॒काद॑शक॒पालं॑ मा॒रु॒तीमा॑मि॒क्षां वा॒रु॒णीमा॑मि॒क्षां  
का॒यमे॒कक॑पालं प्र॒घा॒स्यान् ह॒वाम॑हे म॒रु॒तो य॒ज्ञवा॑ह॒सः क॑रं॒भेण॑

स॒जोष॑सः । मो॒ षू॒ण इ॒न्द्र पृ॒थ्सु दे॒वास्तु॑ स्म ते शु॒ष्मिन्न॑वया ।

म॒ही ह्य॑स्य मी॒ढुषो॑ य॒व्या । ह॒विष्म॑तो म॒रुतो॑ व॒न्दते॑ गीः ।

यद्ग्रा॒मे यद॑रण्ये यथ् स॒भायां य॑दिन्द्रि॒ये ।

यच्छू॒द्रे यद॑र्य ए॒नश्च॑कृ॒माव॑यं ।

यदे॒ ( ) क॒स्याधि॑ ध॒र्मणि॑ तस्या॒ वय॑जनमसि स्वाहा ॥

अ॒क्रन् क॒र्म क॒र्मकृ॑तः स॒ह वा॒चा म॑यो॒भुवा ।

दे॒वेभ्यः॑ क॒र्म कृ॒त्वाऽस्तं॑ प्रे॒त सु॑दानवः । 4

### 1.8.3.1 (Padam)

ऐ॒न्द्रा॒ग्नमि॒त्यैन्द्र॑ – अ॒ग्नम् । ए॒काद॑शक॒पालमि॒त्यैका॑दश-क॒पालम् ।

मा॒रुती॑म् । आ॒मिक्षा॑म् । वा॒रुणी॑म् । आ॒मिक्षा॑म् । का॒यम् ।

ए॒कक॑पालमि॒त्यैक॑-क॒पालं । प्र॒घास्या॑निति प्र-घा॒स्यान् । ह॒वाम॑हे ।

म॒रुतः॑ । य॒ज्ञवा॑हस इति य॒ज्ञ – वा॑हसः । क॒रंभे॑ण । स॒जोष॑स इति

स – जो॑षसः । मो॒ इति॑ । स्वि॒ति । नः॑ । इ॒न्द्र । पृ॒थिस्वि॑ति पृत्-सु ।

दे॒व । अ॒स्तु । स्म । ते॒ । शु॒ष्मिन् । अ॒वया॑ । म॒ही । हि॒ । अ॒स्य ।

मी॒ढुषः॑ । य॒व्या । ह॒विष्म॑तः । म॒रुतः॑ । व॒न्दते॑ । गीः॑ । यत् । ग्रा॒मे ।

यत् । अ॒रण्ये । यत् । स॒भाया॑म् । यत् । इ॒न्द्रि॒ये । यत् । शू॒द्रे । यत् ।  
 अ॒र्ये । ए॒नः । च॒कृ॒म । व॒यम् । यत् ( ) । ए॒कस्य॑ । अधी॑ति ।  
 ध॒र्म॒णि । तस्य॑ । अ॒वय॑जनमित्यव-य॒जनम् । अ॒सि । स्वा॒हा ।  
 अ॒क्र॒न् । क॒र्म । क॒र्म॒कृ॒त इति॑ क॒र्म – कृ॒तः । स॒ह । वा॒चा ।  
 म॒यो॒भुवे॑ति म॒यः-भु॒वा । दे॒वै॒भ्यः । क॒र्म । कृ॒त्वा । अ॒स्तम् । प्रे॑ति ।  
 इ॒त । सु॒दान॑व इति॑ सु-दान॑वः । 4 (70)

(वयं॑ चै॒द्-वि॑ञ्शतिश्च) (A3)

#### 1.8.4.1

अ॒ग्नये॑ऽनी॒कव॑ते पु॒रोडा॑श-म॒ष्टाक॑पालं निर्व॑पति सा॒कञ् सूर्ये॑णोद्य॒ता  
 म॒रुद्भ्यः॑ सा॒न्तप॑ने॒भ्यो म॒ध्यं दि॑ने च॒रुं म॒रुद्भ्यो॑ गृ॒हमे॑धि॒भ्यः  
 सर्वा॑सां दु॒ग्धे सा॒यं च॒रुं पू॒र्णा द॑र्वि॒ परा॑पत सु॒पूर्णा पु॒नरा॑ पत ।  
 व॒स्ने॒व वि॒क्री॑णाव॒हा इ॒षमूर्ज॑ञ् श॒तक्र॑तो दे॒हि मे॑ द॒दामि॑ ते॒ नि मे॑  
 धे॒हि नि॑ ते॒ दधे॑ । नि॒हार॑मि॒न्नि मे॑ ह॒रा नि॑ हा॒रं- [ ] 5



**1.8.4.1 (Padam)**

अ॒ग्नये॑ । अ॒नीक॑व॒त इ॒त्यनी॑क – व॒ते । पु॒रोडा॑शम् ।  
 अ॒ष्टाक॑पा॒लमि॒त्यष्टा॑-क॒पालम् । नि॒रिति॑ । व॒पति॑ । सा॒कम् । सू॒र्येण॑ ।  
 उ॒द्यते॑त्यु॒त् – य॒ता । म॒रुद्भ्य॑ इति॑ म॒रुत् – भ्यः॑ ।  
 सा॒न्तप॑ने॒भ्य इति॑ सां – त॒पने॑भ्यः । म॒ध्यन्दि॑ने । च॒रुम् ।  
 म॒रुद्भ्य॑ इति॑ म॒रुत्-भ्यः॑ । गृ॒हमे॑धि॒भ्य इति॑ गृ॒हमे॑धि-भ्यः ।  
 सर्वा॑साम् । दु॒ग्धे । सा॒यम् । च॒रुम् । पू॒र्णा । द॒र्वि । प॒रेति॑ । प॒त ।  
 सु॒पूर्णे॑ति सु – पू॒र्णा । पु॒नः । ए॒ति । प॒त । व॒स्ना । इ॒व । वी॑ति ।  
 क्री॒णाव॑है । इ॒षम् । ऊ॒र्जम् । श॒तक्र॑तो इति॑ श॒त-क्र॑तो । दे॒हि । मे॒ ।  
 द॒दामि॑ । ते॒ । नी॑ति । मे॒ । धे॒हि । नी॑ति । ते॒ । द॒धे । नि॒हारमि॑ति  
 नि-हा॑रम् । इ॒त् । नी॑ति । मे॒ । ह॒र । नि॒हारमि॑ति नि-हा॑रम् । 5 (50)

**1.8.4.2**

नि॒ ह॒रामि॑ ते । म॒रुद्भ्यः॑ क्री॒डिभ्यः॑ पु॒रोडा॑शं स॒प्तक॑पा॒लं  
 नि॒र्वप॑ति सा॒कं सू॒र्येणो॑द्य॒ता-ग्ने॒यम॑ष्टाक॒पालं नि॒र्वप॑ति सौ॒म्यं च॒रुं  
 सा॒वि॒त्रं द्वा॒दश॑क॒पालं सार॑स्व॒तं च॒रुं पौ॒ष्णं च॒रुमै॑न्द्रा॒ग्न-

मे॒काद॑शक॒पाल-मे॒न्द्रं च॒रुं वै॑श्व॒कर्म॑ण-मे॒कक॑पालं । 6

#### 1.8.4.2 (Padam)

नी॒ति । ह॒रामि॑ । ते । म॒रुद्भ्य॑ इति॒ म॒रुत् - भ्यः॑ । क्री॒डिभ्य॑ इति॒  
क्री॒डि-भ्यः॑ । पु॒रोडा॑शम् । स॒प्तक॑पालमि॒ति स॒प्त-क॑पालम् ।  
नि॒रिति॑ । व॒पति॑ । सा॒कम् । सू॒र्येण॑ । उ॒द्यते॑त्युत् - य॒ता ।  
आ॒ग्नेय॑म् । अ॒ष्टाक॑पालमि॒त्यष्टा॑-क॒पालम् । नि॒रिति॑ । व॒पति॑ ।  
सौ॒म्यम् । च॒रुम् । सा॒वित्र॑म् । द्वा॒दश॑क॒पालमि॒ति द्वा॒दश॑-क॒पालम् ।  
सा॒रस्व॑तम् । च॒रुम् । पौ॒ष्णम् । च॒रुम् । ऐ॒न्द्रा॒ग्नमि॒त्यैन्द्र॑ - अ॒ग्नम् ।  
एका॑दशक॒पालमि॒त्यैका॑दश - क॒पालम् । ऐ॒न्द्रम् । च॒रुम् ।  
वै॒श्वक॑र्मणमि॒ति वै॒श्व - क॑र्मणम् ।  
ए॒कक॑पालमि॒त्येक॑-क॒पालम् । 6(30) (ह॒रा नि॒हारं-त्रि॑ञ्श॒च्च) (A4)

#### 1.8.5.1

सो॒माय॑ पि॒तृम॑ते पु॒रोडा॑शञ् षट्क॒पालं॑ निर्व॑पति पि॒तृभ्यो॑  
बर्॒हिष॑द्भ्यो॒ धा॒नाः पि॒तृभ्यो॑ऽग्नि॒ष्वात्ते॑भ्यो॒ ऽभि॒वा॒न्यायै॑ दु॒ग्धे  
म॒न्थमे॑तत् ते॒ तत॑ ये च॒ त्वाम॑न्वे॒तत् ते॑ पि॒ताम॑ह प्र॒पिता॑मह॒ ये च॒

त्वामन्व॑त्र॒ पित॑रो यथाभा॒गं म॑न्दध्व॒ꣳसुसं॑दृशं॒ त्वा व॑यं म॒घव॑न्  
मन्दि॑षीमहि॒ । प्र॒नू॒नं पू॒र्णव॑न्धुरः स्तु॒तो या॑सि व॒शाꣳ अनु॑ ।  
यो॒जान्वि॑न्द्र ते ह॒री ॥ 7

**1.8.5.1 (Padam)**

सो॒माय॑ । पि॒तृ॒मत॑ इति॒ पि॒तृ – म॑ते॒ । पु॒रो॒डा॒शम् । ष॒ट्क॑पा॒लमि॒ति  
ष॒ट् – क॒पा॒लम् । नि॒रि॒ति । व॒प॒ति । पि॒तृ॒भ्य इति॒ पि॒तृ – भ्यः॑ ।  
ब॒र्हि॒षद्भ्य॑ इति॒ ब॒र्हि॒षद्–भ्यः॑ । धा॒नाः । पि॒तृ॒भ्य इति॒  
पि॒तृ–भ्यः॑ । अ॒ग्नि॒ष्वा॒त्तेभ्य॑ इत्य॒ग्नि–स्वा॒त्तेभ्यः॑ । अ॒भि॒वा॒न्याया  
इत्य॒भि–वा॒न्यायै॑ । दु॒ग्धे । म॒न्थम् । ए॒तत् । ते॒ । त॒त । ये॒ । च॒ ।  
त्वा॒म् । अ॒न्वि॒ति । ए॒तत् । ते॒ । पि॒ता॒म॒ह । प्र॒पि॒ता॒म॒हेति॑  
प्र – पि॒ता॒म॒ह । ये॒ । च॒ । त्वा॒म् । अ॒न्वि॒ति । अ॒त्र । पि॒तरः॑ ।  
यथा॒भा॒गमि॒ति यथा॑ – भा॒गम् । म॑न्दध्वम् । सु॒सं॑दृशमि॒ति  
सु – सं॑दृशम् । त्वा॒ । व॒यम् । म॒घव॑न्निति॒ म॒घ–व॑न् । म॒न्दि॑षीमहि॒ ।  
प्रेति॑ । नू॒नम् । पू॒र्णव॑न्धुर इति॒ पू॒र्ण – व॑न्धुरः । स्तु॒तः । या॑सि ।  
व॒शान् । अनु॑ । यो॒जा ॥ नु॑ । इ॒न्द्र । ते॒ । ह॒री इति॑ । 7 (50)

**1.8.5.2**

अक्ष॑न्नमी॒मद॑न्त ह्य॒व प्रि॒या अ॒धूष॑त । अस्तो॑षत स्व॒भान॑वो वि॒प्रा  
नवि॑ष्ठया म॒ती । यो॒जा न्वि॑न्द्र ते ह॒री । अक्ष॑न् पि॒तरोऽमी॒मद॑न्त  
पि॒तरोऽती॑तृपन्त पि॒तरोऽमी॑मृजन्त पि॒तरः । प॒रेत॑ पि॒तरः सो॒म्या ग॑म्भीरैः  
प॒थिभिः॑ पू॒र्व्यैः । अथा॑ पि॒तृन्त् सु॒विद॑न्ना॒प् अपी॑त यमे॒न ये स॑ध॒मादं  
मद॑न्ति । मनो॑ न्वा हु॒वामहे॑ ना॒राश॑ से॒न स्तो॑मे॒न पि॒तृणां॑ च  
मन्म॑भिः । आ – [ ] 8

**1.8.5.2 (Padam)**

अक्ष॑न् । अमी॒मद॑न्त । हि । अवे॑ति । प्रि॒याः । अ॒धूष॑त । अस्तो॑षत ।  
स्व॒भान॑व इति स्व-भान॑वः । वि॒प्राः । नवि॑ष्ठया । म॒ती । यो॒जा । नु ।  
इन्द्र॑ । ते । ह॒री इति॑ । अक्ष॑न् । पि॒तरः । अमी॒मद॑न्त । पि॒तरः ।  
अती॑तृपन्त । पि॒तरः । अमी॑मृजन्त । पि॒तरः । प॒रेति॑ । इ॒त । पि॒तरः ।  
सो॒म्याः । गं॒भीरैः॑ । प॒थिभि॑रिति प॒थि-भिः॑ । पू॒र्व्यैः । अथ॑ । पि॒तृन् ।  
सु॒विद॑न्नानिति सु – वि॒दन्नान् । अपी॑ति । इ॒त । यमे॑न । ये ।  
स॒ध॒माद॑मिति स॒ध – मा॑दम् । मद॑न्ति । मनः॑ । नु । ए॒ति । हु॒वामहे॑ ।

नारा॒श॒से॒न । स्तो॒मे॒न । पि॒तृ॒णाम् । च । म॒न्म॒भिरि॒ति म॒न्म – भिः ।  
ए॒ति । 8 (50)

### 1.8.5.3

न ए॒तु म॒नः पु॒नः क्र॒त्वे द॒क्षाय जी॒वसे॑ । ज्यो॒क्च सूर्यं॑ दृ॒शे ।  
पु॒नर्नः पि॒तरो म॒नो द॒दातु॑ दै॒व्यो ज॒नः । जी॒वं व्रा॒तं स॒चेम॑हि ।  
यद॒न्तरि॑क्षं पृ॒थि॒वीमु॒त द्यां य॑न्मा॒तरं पि॒तरं वा जि॒हि॒सिम॑ ।  
अ॒ग्नि॒र्मा तस्मा॑दे॒नसो॑ गा॒र्ह॒पत्यः॑ प्र॒मुञ्च॑तु दु॒रिता॑ या॒नि च॒कृम॑  
क॒रोतु॑ मा॒मने॑न॒सं । 9

### 1.8.5.3 (Padam)

न । ए॒तु । म॒नः । पु॒नः । क्र॒त्वे॑ । द॒क्षाय॑ । जी॒वसे॑ । ज्यो॒क् । च ।  
सूर्य॑म् । दृ॒शे । पु॒नः । नः । पि॒तरः॑ । म॒नः । द॒दातु॑ । दै॒व्यः । ज॒नः ।  
जी॒वम् । व्रा॒तम् । स॒चेम॑हि । यत् । अ॒न्तरि॑क्षम् । पृ॒थि॒वीम् । उ॒त ।  
द्याम् । यत् । मा॒तरम् । पि॒तरम् । वा । जि॒हि॒सिम॑ । अ॒ग्निः । मा ।  
तस्मा॑त् । ए॒नसः॑ । गा॒र्ह॒पत्य॑ इति गा॒र्ह॒पत्यः॑ । प्रेति॑ । मु॒ञ्च॑तु ।  
दु॒रिते॑ति दुः – इ॒ता । या॒नि । च॒कृम॑ । क॒रोतु॑ । मा॒म् ।

अ॒ने॒न॒स॒म् । ९ (४४) (ह॒री-म॒न्म॒भि॒रा-च॒तु॒श्च॒त्वा॒रि॒ञ्श॒च्च) (A5)

**1.8.6.1**

प्र॒ति॒पू॒रु॒ष॒मे॒क॒क॒पा॒ला॒न्नि॒र्व॒प॒त्ये॒क-म॒ति॒रि॒क्तं॑ या॒व॒न्तो॑ गृ॒ह्याः॑  
स्म॒स्ते॒भ्यः॑ क॒म॒करं॑ प॒शूना॑ञ् श॒र्मा॒सि॒ शर्म॑ य॒ज॒मा॒न॒स्य॑ श॒र्म मे॑  
य॒च्छै॒क ए॒व रु॒द्रो न॑ द्वि॒तीया॑य त॒स्थ आ॒खु॒स्ते रु॒द्र प॒शु॒स्तं जु॒षस्वै॒ष  
ते॒ रु॒द्र भा॒गः स॒ह स्व॒स्रां-बि॒क॒या तं॒जु॒षस्व॑ भे॒षजं॑ ग॒वेऽश्वा॑य  
पु॒रु॒षाय॑ भे॒षज॑म॒थो अ॒स्मभ्यं॑ भे॒षज॑ञ् सु॒भे॒षजं॑ - [ ] 10

**1.8.6.1 (Padam)**

प्र॒ति॒पू॒रु॒ष॒मि॒ति॒ प्र॒ति-पू॒रु॒ष॒म् । ए॒क॒क॒पा॒ला॒नि॒त्ये॒क-क॒पा॒ला॒न् ।  
नि॒रि॒ति । व॒प॒ति । ए॒क॒म् । अ॒ति॒रि॒क्त॒मि॒त्य॒ति-रि॒क्त॒म् । या॒व॒न्तः॑ ।  
गृ॒ह्याः॑ । स्मः॑ । ते॒भ्यः॑ । क॒म् । अ॒क॒र॒म् । प॒शूना॑म् । श॒र्म । अ॒सि॒ ।  
श॒र्म । य॒ज॒मा॒न॒स्य॑ । श॒र्म । मे॑ । य॒च्छ॑ । ए॒कः॑ । ए॒व । रु॒द्रः॑ । न॑ ।  
द्वि॒तीया॑य । त॒स्थे॑ । आ॒खुः॑ । ते॒ । रु॒द्र । प॒शुः॑ । त॒म् । जु॒षस्व॑ ।  
ए॒षः॑ । ते॒ । रु॒द्र । भा॒गः॑ । स॒ह । स्व॒स्रा॑ । अ॒ंबि॒क॒या॑ । त॒म् ।  
जु॒षस्व॑ । भे॒षज॑म् । ग॒वे॑ । अ॒श्वा॑य । पु॒रु॒षाय॑ । भे॒षज॑म् ।

अथो॑ इति॑ । अ॒स्मभ्य॑मित्य॒स्म-भ्य॑म् । भेष॒जम् ।

सुभेष॒जमि॑ति सु – भेष॒जम् । 10 (50)

### 1.8.6.2

यथा॑ऽसति॑ । सु॒गं मेषा॑य मेष्या॑ अवा॑ंब रु॒द्रमदि॑-मह्य॑व दे॒वं त्र्य॑ंबकं ।

यथा॑ नः श्रेय॑सः कर॒द्यथा॑ नो वस्य॑सः कर॒द्यथा॑ नः पशु॑मतः

कर॒द्यथा॑ नो व्यव॑साययात् । त्र्य॑ंबकं य॒जामहे॑ सु॒गन्धिं॑ पु॒ष्टिव॑र्धनं ।

उ॒र्वारु॑कमि॒व बन्ध॑नान् मृ॒त्यो मु॑क्षी॒य माऽमृ॑तात् । ए॒ष ते॑ रु॒द्र भा॒गस्तं॑

जुष॑स्व ते॒नाव॑से॒न प॒रो मू॒जव॑तोऽती॒ह्य ( ) व॑तत ध॒न्वा पि॑नाकहस्तः

कृ॒त्तिवा॑साः । 11

### 1.8.6.2 (Padam)

यथा॑ । अ॒सति॑ । सु॒गमि॑ति सु-गम् । मेषा॑य । मेष्या॑ । अवे॑ति । अ॒ंब ।

रु॒द्रम् । अ॒दिम॑हि । अवे॑ति । दे॒वम् । त्र्य॑ंबकमि॒ति त्रि-अ॒ंबक॑म् ।

यथा॑ । नः । श्रेय॑सः । कर॒त् । यथा॑ । नः । वस्य॑सः । कर॒त् । यथा॑ ।

नः । पशु॑मत इति पशु – मतः । कर॒त् । यथा॑ । नः ।

व्यव॑साययादिति वि – अ॒वसा॑ययात् । त्र्य॑ंबकमि॒ति त्रि – अ॒ंबक॑म् ।

य॒जाम॑हे । सु॒गन्धि॑मि॒ति सु॒-गन्धि॑म् । पु॒ष्टि॒वर्ध॑नमि॒ति पु॒ष्टि॒-वर्ध॑नम् ।  
 उ॒र्वारु॑कम् । इ॒व । ब॒न्धना॑त् । मृ॒त्योः । मु॒क्षी॒य । मा । अ॒मृता॑त् ।  
 ए॒षः । ते । रु॒द्र । भा॒गः । तम् । जु॒षस्व । ते॒न । अ॒वसे॑न । प॒रः ।  
 मू॒जव॑त इति॒ मू॒ज – व॑तः । अ॒तीति॑ । इ॒हि ( ) ।  
 अ॒वत॑त॒धन्वे॑त्य॒वत॑त – ध॒न्वा । पि॒नाक॑हस्त इति॒ पि॒नाक – ह॒स्तः ।  
 कृ॒त्तिवा॑सा इति॒ कृ॒त्ति – वा॑साः । 11 (53)

(सु॒भैष॑ज-मि॒हि त्री॑णि च) (A6)

### 1.8.7.1

ऐ॒न्द्रा॒ग्नं द्वा॑द॒शक॑पालं॒ वैश्व॑दे॒वं च॑रुमि॒न्द्राय॑ शु॒नासी॑राय पु॒रोडा॑शं  
 द्वा॒द॒शक॑पालं॒ वा॒यव्यं॑ प॒यः सौ॒र्यमे॑क॒कपालं॑ द्वा॒द॒शग॑व॒ः सी॒रं दक्षि॑णा  
 ऽऽग्ने॑यम॒ष्टाक॑पालं॒ निर्व॑पति॒ रौद्रं॑ गा॒वीधु॑कं च॒रुमै॑न्द्रं दधि॒ वारु॑णं  
 य॒वम॑यं च॒रुं व॑हि॒नी धे॒नुर्दक्षि॑णा ये दे॒वाः पु॒रः स॒दोऽग्नि॑ने॒त्रा  
 दक्षि॑णस॒दो य॒मने॑त्राः प॒श्चात्स॑दः स॒वितृ॑ ने॒त्रा उत्त॑रस॒दो व॑रुण ने॒त्रा  
 उ॒परि॑ष॒दो बृ॒हस्प॑ति ने॒त्रा रक्षो॑ह॒णस्ते॑ नः पा॒न्तु ते नो॑ऽव॒न्तु  
 तेभ्यो॑ – [ ] 12



**1.8.7.1 (Padam)**

ऐ॒न्द्रा॒ग्न॒मित्यै॒न्द्र॒ – अ॒ग्न॒म् । द्वा॒द॒श॒क॒पा॒ल॒मि॒ति॒ द्वा॒द॒श॒ – क॒पा॒ल॒म् ।  
 वै॒श्व॒दे॒व॒मि॒ति॒ वै॒श्व॒-दे॒व॒म् । च॒रु॒म् । इ॒न्द्रा॒य॒ । शु॒ना॒सी॒रा॒य॒ ।  
 पु॒रो॒डा॒श॒म् । द्वा॒द॒श॒क॒पा॒ल॒मि॒ति॒ द्वा॒द॒श॒ – क॒पा॒ल॒म् ।  
 वा॒य॒व्य॒म् । प॒यः॒ । सौ॒र्य॒म् । ए॒क॒क॒पा॒ल॒मि॒त्ये॒क॒ – क॒पा॒ल॒म् ।  
 द्वा॒द॒श॒ग॒व॒मि॒ति॒ द्वा॒द॒श॒ – ग॒व॒म् । सी॒र॒म् । दक्षि॑णा । आ॒ग्ने॒य॒म् ।  
 अ॒ष्टा॒क॒पा॒ल॒मि॒त्य॒ष्टा॒ – क॒पा॒ल॒म् । नि॒रि॒ति॒ । व॒प॒ति॒ । रौ॒द्र॒म् ।  
 गा॒वी॒धु॒क॒म् । च॒रु॒म् । ऐ॒न्द्र॒म् । दधि॑ । वा॒रु॒ण॒म् ।  
 य॒व॒म॒य॒मि॒ति॒ य॒व॒-म॒य॒म् । च॒रु॒म् । वहि॑नी । धे॒नुः॒ । दक्षि॑णा । ये॒ ।  
 दे॒वाः॒ । पु॒रः॒ स॒द॒ इति॑ पु॒रः॒ – स॒दः॒ । अ॒ग्नि॒ने॒त्रा॒ इत्य॑ग्नि – ने॒त्राः॒ ।  
 दक्षि॑ण॒स॒द॒ इति॑ दक्षि॑ण – स॒दः॒ । य॒म॒ने॒त्रा॒ इति॑ य॒म॒ – ने॒त्राः॒ ।  
 प॒श्चा॒त्स॒द॒ इति॑ प॒श्चा॒त् – स॒दः॒ । स॒वि॒तृ॒ने॒त्रा॒ इति॑ स॒वि॒तृ॒ – ने॒त्राः॒ ।  
 उ॒त्त॒र॒स॒द॒ इत्यु॑त्तर – स॒दः॒ । व॒रु॒ण॒ने॒त्रा॒ इति॑ व॒रु॒ण॒ – ने॒त्राः॒ ।  
 उ॒प॒रि॒ष॒द॒ इत्यु॑परि – स॒दः॒ । बृ॒ह॒स्प॒ति॒ने॒त्रा॒ इति॑ बृ॒ह॒स्प॒ति॒ – ने॒त्राः॒ ।

रक्षो॑हण॒ इति॑ रक्षः – ह॒नः । ते । नः । पा॒न्तु । ते । नः ।

अ॒वन्तु॑ । ते॒भ्यः । 12 (50)

### 1.8.7.2

नम॑स्ते॒भ्यः स्वा॒हा समू॑ढं रक्षः॑ संद॑ग्धं रक्ष इ॒दमहं॑ रक्षो॑ऽभि  
संद॑हाम्य॒ग्नये॑ रक्षो॑घ्ने स्वा॒हा यमा॑य स॒वित्रे॑ वरु॒णाय॑ बृ॒हस्प॑तये  
दुव॑स्वते रक्षो॑घ्ने स्वा॒हा प्र॒ष्टिवा॑ही रथो॑ दक्षि॒णा दे॒वस्य॑ त्वा स॒वितुः॑  
प्रस॑वे॒ऽश्विनो॑र्बा॒हुभ्यां॑ पू॒ष्णो ह॒स्ताभ्यां॑ रक्ष॑सो व॒धं जु॑होमि ह॒तं  
रक्षो॑ऽवधि॒ष्म रक्षो॑ यद्वस्ते॑ तदक्षि॒णा । 13

### 1.8.7.2 (Padam)

नमः॑ । ते॒भ्यः । स्वा॒हा । समू॑ढमि॒ति सं – ऊ॒ढम् । रक्षः॑ ।  
संद॑ग्धमि॒ति सं-द॒ग्धम् । रक्षः॑ । इ॒दम् । अ॒हम् । रक्षः॑ । अ॒भि ।  
समि॒ति । द॒हामि॑ । अ॒ग्नये॑ । रक्षो॑घ्न इति॑ रक्षः – घ्ने । स्वा॒हा ।  
यमा॑य । स॒वित्रे॑ । वरु॒णाय॑ । बृ॒हस्प॑तये । दुव॑स्वते । रक्षो॑घ्न इति॑  
रक्षः-घ्ने । स्वा॒हा । प्र॒ष्टिवा॑हीति प्र॒ष्टि-वा॑ही । रथः॑ । दक्षि॒णा ।  
दे॒वस्य॑ । त्वा । स॒वितुः॑ । प्रस॑व इति॑ प्र – स॒वे । अ॒श्विनोः॑ ।

बा॒हु॒भ्या॒मिति॑ बा॒हु-भ्या॒म् । पू॒ष्णः॑ । ह॒स्ता॒भ्या॒म् । रक्ष॑सः । व॒धम् ।  
जु॒हो॒मि । ह॒तम् । रक्षः॑ । अ॒वधि॑ष्म । रक्षः॑ । यत् । व॒स्ते॑ । तत् ।  
दक्षि॑णा । 13 (45) (ते॒भ्यः-पञ्च॑च॒त्वारि॑ञ्श॒च्च) (A7)

### 1.8.8.1

धा॒त्रे पु॒रोडा॑शं द्वा॒दश॑क॒पालं॑ निर्व॑प॒त्यनु॑म॒त्यै च॒रुञ् रा॒कायै॑ च॒रुञ्  
सि॒नीवा॒ल्यै च॒रुं कु॒ह्वै च॒रुं मि॒थुनौ॑ गा॒वौ दक्षि॑णा  
ऽऽ॒ग्नावै॒ष्णव॑मे॒काद॑शक॒पालं॑ निर्व॑प॒त्यैन्द्रा-वै॒ष्णव॑मे॒काद॑शक॒पालं॑  
वै॒ष्णवं त्रि॑क॒पालं॑ वा॒मनो॑ व॒ही दक्षि॑णा ऽग्नी॒षोमी॑य-मे॒काद॑शक॒पालं॑  
निर्व॑प॒तीन्द्रा॒सोमी॑य-मे॒काद॑शक॒पालञ् सौ॒म्यं च॒रुं ब॒भ्रुर्दक्षि॑णा  
सो॒मापौ॑ष्णं च॒रुं निर्व॑प॒त्यैन्द्रा॒पौष्णं॑ च॒रुं पौ॑ष्णं च॒रुञ् श्या॒मो दक्षि॑णा  
वै॒श्वान॑रं द्वा॒दश॑क॒पालं॑ नि ( ) र्व॑प॒ति हि॒रण्यं॑ दक्षि॑णा वा॒रुणं॑ य॒वम॑यं  
च॒रुम॑श्चो॒दक्षि॑णा । 14

### 1.8.8.1 (Padam)

धा॒त्रे । पु॒रोडा॑शम् । द्वा॒दश॑क॒पाल॒मिति॑ द्वा॒दश॑ - क॒पाल॒म् । नि॒रिति॑ ।  
व॒पति॑ । अ॒नुम॑त्या इ॒त्यनु॑ - म॒त्यै । च॒रुम् । रा॒कायै॑ । च॒रुम् ।

सिनी॒वा॒ल्यै । च॒रुम् । कु॒ह्वै॑ । च॒रुम् । मि॒थु॒नौ । गा॒वौ॑ । दक्षि॑णा ।  
 आ॒ग्ना॒वै॒ष्ण॒वमि॒त्या॒ग्ना – वै॒ष्ण॒वम् ।  
 ए॒का॒द॒श॒क॒पा॒लमि॒त्यै॒का॒द॒श – क॒पा॒लम् । नि॒रि॒ति॑ । व॒प॒ति॑ ।  
 ऐ॒न्द्रा॒वै॒ष्ण॒वमि॒त्यै॒न्द्रा – वै॒ष्ण॒वम् ।  
 ए॒का॒द॒श॒क॒पा॒लमि॒त्यै॒का॒द॒श – क॒पा॒लम् । वै॒ष्ण॒वम् । त्रि॒क॒पा॒लमि॒ति॑  
 त्रि – क॒पा॒लम् । वा॒म॒नः॑ । व॒ही॑ । दक्षि॑णा ।  
 अ॒ग्नी॒षो॒मी॒यमि॒त्य॒ग्नी – सो॒मी॒यम् ।  
 ए॒का॒द॒श॒क॒पा॒लमि॒त्यै॒का॒द॒श – क॒पा॒लम् ।  
 नि॒रि॒ति॑ । व॒प॒ति॑ । इ॒न्द्रा॒सो॒मी॒यमि॒ती॒न्द्रा – सो॒मी॒यम् ।  
 ए॒का॒द॒श॒क॒पा॒लमि॒त्यै॒का॒द॒श – क॒पा॒लम् । सौ॒म्यम् । च॒रुम् । ब॒भ्रुः॑ ।  
 दक्षि॑णा । सो॒मा॒पौ॒ष्णमि॒ति॑ सो॒मा – पौ॒ष्णम् । च॒रुम् । नि॒रि॒ति॑ ।  
 व॒प॒ति॑ । ऐ॒न्द्रा॒पौ॒ष्णमि॒त्यै॒न्द्रा – पौ॒ष्णम् । च॒रुम् । पौ॒ष्णम् । च॒रुम् ।  
 श्या॒मः । दक्षि॑णा । वै॒श्वान॒रम् । द्वा॒द॒श॒क॒पा॒लमि॒ति॑ द्वा॒द॒श–क॒पा॒लम् ।  
 नि॒रि॒ति॑ ( ) । व॒प॒ति॑ । हि॒र॒ण्यम् । दक्षि॑णा । वा॒रु॒णम् ।

यवमयमिति॑ यव॑ – मय॑म् । चरु॑म् । अश्वः॑ । दक्षि॑णा । 14 (58)

(वैश्वान॑रं द्वा॒दश॑कपा॒लं नि॒-र॑ष्टौ च॑) (A8)

### 1.8.9.1

बा॒र्हस्प॑त्यं चरुं॑ निर्व॑पति ब्र॒ह्म॑णो गृ॒हे शि॑तिपृ॒ष्ठो दक्षि॑णैन्द्र-  
मे॒काद॑शकपा॒लं राज॑न्यस्य गृ॒ह ऋ॑षभो दक्षि॑णाऽऽदि॒त्यं चरुं॑ म॒हिष्यै॑  
गृ॒हे धे॒नुर्दक्षि॑णानैर्ऋ॒तं चरुं॑ परि॒वृ॒क्त्यै गृ॒हे कृ॒ष्णानां॑ व्री॒हीणां॑  
नख॑निर्भिन्नं कृ॒ष्णा कू॒टा दक्षि॑णा ऽऽग्ने॒यम॑ष्टाकपा॒लं से॒नान्यो॑ गृ॒हे  
हि॒रण्यं दक्षि॑णा वा॒रुणं॑ द॒शक॑पा॒लं सू॒तस्य॑ गृ॒हे म॒हानि॑र॒ष्टो दक्षि॑णा  
मा॒रुतं॑ स॒प्तक॑पा॒लं ग्रा॒म॒ण्यो गृ॒हे पृ॒श्नि॒र्दक्षि॑णा  
सा॒वि॒त्रं द्वा॒दश॑कपा॒लं – [ ] 15

### 1.8.9.1 (Padam)

बा॒र्हस्प॑त्यम् । चरु॑म् । निरि॑ति । व॒पति॑ । ब्र॒ह्म॑णः । गृ॒हे ।  
शि॒तिपृ॒ष्ठ इति॑ शि॒ति – पृ॒ष्ठः । दक्षि॑णा । ऐ॒न्द्रम् ।  
ए॒काद॑शकपा॒लमित्ये॑काद॒श-क॑पा॒लम् । राज॑न्यस्य । गृ॒हे । ऋ॑षभः ।  
दक्षि॑णा । आ॒दि॒त्यम् । चरु॑म् । म॒हिष्यै॑ । गृ॒हे । धे॒नुः । दक्षि॑णा ।

नैर्ऋतमिति नैः-ऋतम् । चरुम् । परिवृक्त्या इति परि-वृक्त्यै ॥  
 गृहे । कृष्णानाम् ॥ व्रीहीणाम् । नखनिर्भिन्नमिति नख-निर्भिन्नम् ।  
 कृष्णा । कूटा । दक्षिणा । आग्नेयम् ।  
 अष्टाकपालमित्यष्टा – कपालम् । सेनान्य इति सेना – न्यः । गृहे ।  
 हिरण्यम् । दक्षिणा । वारुणम् । दशकपालमिति दश-कपालम् ।  
 सूतस्य । गृहे । महानिरष्ट इति महा-निरष्टः ।  
 दक्षिणा । मारुतम् । सप्तकपालमिति सप्त – कपालम् ।  
 ग्रामण्य इति ग्राम – न्यः । गृहे । पृश्निः । दक्षिणा । सावित्रम् ।  
 द्वादशकपालमिति द्वादश – कपालम् । 15 (50)

### 1.8.9.2

क्षत्तुर्गृह उपध्वस्तो दक्षिणाऽऽश्विनं द्विकपालं संग्रहीतुर्गृहे सवात्यौ  
 दक्षिणा पौष्णं चरुं भागदुघस्य गृहे श्यामो दक्षिणा रौद्रं गावीधुकं  
 चरुमक्षावापस्य गृहे शबल उद्धारो दक्षिणेन्द्राय सुत्राम्णो पुरोडाश-  
 मेकादशकपालं प्रति निर्वपतीन्द्रायाऽहोमुचे ऽयं नो राजा वृत्रहा  
 राजा भूत्वा वृत्रं वध्यान् मैत्राबार्हस्पत्यं भवति श्वेतायै ॥

श्वेतव॒त्सायै॑ दु॒ग्धे स्व॑यं मूर्ते॑ स्वयंमथि॒त आज्य॑ आश्व॒त्थे – [ ] 16

**1.8.9.2 (Padam)**

क्ष॒त्तुः । गृ॒हे । उप॒ध्वस्त॑ इत्युप – ध्वस्तः॑ । दक्षि॑णा । आ॒श्विन॑म् ।  
द्वि॒क॒पा॒लमि॑ति द्वि – क॒पा॒लम् । सङ्ग्र॑हीतुरिति सं-ग्र॑हीतुः । गृ॒हे ।  
स॒वा॒त्या॒वि॒ति स – वा॒त्यौ । दक्षि॑णा । पौ॒ष्णम् । च॒रुम् ।  
भा॒गदु॒घस्ये॑ति भा॒ग – दु॒घस्य॑ । गृ॒हे । श्या॒मः । दक्षि॑णा । रौ॒द्रम् ।  
गा॒वी॒धुक॑म् । च॒रुम् । अ॒क्षा॒वा॒पस्ये॑त्यक्ष – आ॒वा॒पस्य॑ । गृ॒हे ।  
श॒बलः॑ । उ॒द्धार॑ इत्युत् – वा॒रः । दक्षि॑णा । इन्द्रा॑य । सु॒त्रा॒ण इति॑  
सु – त्रा॒णै । पु॒रो॒डा॒शम् । ए॒का॒द॒शक॑पा॒लमि॑त्ये॒का॒द॒श – क॒पा॒लम् ।  
प्र॒ति । नि॒री॒ति । व॒पति॑ । इन्द्रा॑य । अ॒हो॒मु॒च इत्य॑हः-मु॒चे ।  
अ॒यम् । नः॑ । रा॒जा । वृ॒त्रहे॑ति वृ॒त्र-हा॑ । रा॒जा । भू॒त्वा । वृ॒त्रम् ।  
व॒ध्यात् । मै॒त्रा॒बा॒र्ह॒स्पत्य॑मि॒ति मै॒त्रा-बा॒र्ह॒स्पत्य॑म् । भ॒वति॑ ।  
श्वे॒तायै॑ । श्वेत॑व॒त्साया॑ इति श्वेत॑-व॒त्सायै॑ । दु॒ग्धे ।  
स्व॒यंमूर्त॑ इति स्व॒यम्-मूर्ते॑ । स्व॒यंमथि॑त इति स्व॒यं – मथि॑ते ।  
आ॒ज्ये । आ॒श्वत्थे॑ । 16 (50)

**1.8.9.3**

पात्रे॑ चतुः॑ स्रक्तौ॑ स्वयमवपन्नायै॑ शाखायै॑ कर्णा॑ञ्चाकर्णा॑ञ्च  
तण्डुलान्॑ विचिनुयाद्ये॑ कर्णाः॑ स पयसि॑ बार्हस्पत्यो॑ येऽकर्णाः॑ स  
आज्ये॑ मैत्रः॑ स्वयं॑ कृता॑ वेदिर्भवति॑ स्वयंदिनं॑ बर्हिः॑ स्वयं॑ कृत  
इध्मः॑ सैव॑ श्वेता॑ श्वेतवथ्सा॑ दक्षिणा॑ । 17

**1.8.9.3 (Padam)**

पात्रे॑ । चतुः॑ स्रक्ताविति॑ चतुः॑ – स्रक्तौ॑ । स्वयमवपन्नाया॑ इति॑  
स्वयं–अवपन्नायै॑ । शाखायै॑ । कर्णान्॑ । च॑ । अकर्णान्॑ । च॑ ।  
तण्डुलान्॑ । वीति॑ । चिनुयात्॑ । ये॑ । कर्णाः॑ । सः॑ । पयसि॑ ।  
बार्हस्पत्यः॑ । ये॑ । अकर्णाः॑ । सः॑ । आज्ये॑ । मैत्रः॑ ।  
स्वयंकृतेति॑ स्वयम् – कृता॑ । वेदिः॑ । भवति॑ । स्वयंदिनमिति॑  
स्वयं – दिनम्॑ । बर्हिः॑ । स्वयंकृत॑ इति॑ स्वयं – कृतः॑ । इध्मः॑ ।  
सा॑ । एव॑ । श्वेता॑ । श्वेतवथ्सेति॑ श्वेत – वथ्सा॑ । दक्षिणा॑ । 17 (33)

(सावित्रं॑ द्वादशकपाल–माश्वत्थे॑ त्रयस्त्रिंशच्च) (A9)

**1.8.10.1**

अग्नये॑ गृहपतये॑ पुरोडाशमष्टाकपालं॑ निर्वपति॑ कृष्णानां॑ व्रीहीणाञ्



सो॒माय॑ व॒नस्प॑तये॒ श्या॒माकं॑ च॒रुः॑ स॒वि॒त्रे स॒त्यप्र॑सवाय॒ पुरो॑डाशं  
 द्वा॒दश॑क॒पाल॑मा॒शूनां॑ व्री॒हीणा॑ रु॒द्राय॑ प॒शुप॑तये॒ गा॒वीधु॑कं च॒रुं  
 बृ॒हस्प॑तये॒ वाच॑स्पतये॒ नै॒वारं॑ च॒रुमि॑न्द्राय॒ ज्ये॒ष्ठाय॑ पुरो॑डाशं—  
 मे॒काद॑शक॒पालं॑ म॒हाव्री॑हीणां मि॒त्राय॑ स॒त्याया ऽऽम्ब॑ानां च॒रुं व॑रु॒णाय॑  
 ध॒र्मप॑तये॒ यव॑मयं च॒रुः॑ स॒वि॒ता त्वा प्र॑सवा॒ना सु॑वताम॒ग्नि  
 गृ॒हप॑तीनां॑ सो॒मो व॒नस्प॑तीनां॑ रु॒द्रः प॒शूनां॑ – [ ] 18

**1.8.10.1 (Padam)**

अ॒ग्नये॑ । गृ॒हप॑तय॒ इति॑ गृ॒ह – प॑तये । पुरो॑डाशम् ।  
 अ॒ष्टाक॑पालमि॒त्यष्टा॑ – क॒पालम् । नि॒रिति॑ । व॒पति॑ । कृ॒ष्णाना॑म् ।  
 व्री॒हीणा॑म् । सो॒माय॑ । व॒नस्प॑तये । श्या॒माकम् । च॒रुम् । स॒वि॒त्रे ।  
 स॒त्यप्र॑सवायेति॒ सत्य॑ – प्र॒सवा॑य । पुरो॑डाशम् । द्वा॒दश॑क॒पालमि॑ति  
 द्वा॒दश॑ – क॒पालम् । आ॒शूना॑म् । व्री॒हीणा॑म् । रु॒द्राय॑ । प॒शुप॑तय॒ इति॑  
 प॒शु – प॑तये । गा॒वीधु॑कम् । च॒रुम् । बृ॒हस्प॑तये । वा॒चः । प॑तये ।  
 नै॒वारम् । च॒रुम् । इ॒न्द्राय॑ । ज्ये॒ष्ठाय॑ । पुरो॑डाशम् ।  
 ए॒काद॑शक॒पालमि॒त्येका॑दश – क॒पालम् ।

महा॑व्री॒हीणा॑मिति॑ महा-व्री॒हीणाम् । मि॒त्राय॑ । स॒त्याय॑ । आ॒ंबाना॑म् ।  
च॒रुम् । व॒रुणाय॑ । ध॒र्मप॑तय इति॑ ध॒र्म – प॑तये । य॒वम॑यमिति॑  
य॒व – म॑यम् । च॒रुम् । स॒विता । त्वा । प्र॒स॒वाना॑मिति॑  
प्र – स॒वाना॑म् । सु॒वता॑म् । अ॒ग्निः । गृ॒हप॑तीनामिति॑  
गृ॒ह – प॑तीनाम् । सोमः॑ । व॒नस्प॑तीनाम् । रु॒द्रः । प॒शूना॑म् । 18 (50)

**1.8.10.2**

बृ॒हस्प॑ति॒र्वाचा॑मिन्द्रो॑ ज्ये॒ष्ठानां॑ मि॒त्रः स॒त्यानां॑ व॒रुणो॑  
ध॒र्मप॑तीनां॑ ये॒ दे॒वा दे॒वसु॑वः स्थ त इ॒ममा॑मु॒ष्याय॑णमनमि॒त्राय॑  
सु॒वध्वं॑ म॒हते॑ क्ष॒त्राय॑ म॒हत॑ आ॒धिप॑त्याय म॒हते॑ जा॒नरा॑ज्यायैष वो  
भ॒रता॑ रा॒जा सो॒मोऽस्मा॑कं ब्रा॒ह्मणा॑नां॒ राजा॑  
प्र॒तित्य॑न्नाम॒ राज्य॑म॒धायि॑ स्वां त॒नुवं॑ व॒रुणो॑ अ॒शि॒श्रे॒च्छुचे॑र्मि॒त्रस्य॑  
व॒रुण॑स्याभू॒वन्वि॑ मि॒त्र ए॒वैर॑रातिम॒तारी॑द॒सूषु॑दन्त॒ यज्ञि॑या ऋ॒तेन॑  
व्यु॒ त्रि॒तो ज॑रि॒माणं॑ न आ॒नङ् वि॒ष्णोः॑ क्र॒मोऽसि॑ वि॒ष्णोः॑  
क्रा॒न्तम॑सि॒ वि॒ष्णोर्वि॑क्रा॒न्तम॑सि । 19

**1.8.10.2 (Padam)**

बृ॒ह॒स्प॒तिः॑ । वा॒च॒म् । इन्द्रः॑ । ज्ये॒ष्ठाना॑म् । मि॒त्रः । स॒त्याना॑म् ।  
 वरु॑णः । धर्म॑प॒तीना॑मि॒ति धर्म॑ – प॒तीना॑म् । ये । दे॒वाः । दे॒वसु॑व  
 इति॑ दे॒व – सु॒वः । स्थ । ते । इ॒मम् । आ॒मुष्या॑यणम् । अ॒नमि॑त्राय ।  
 सु॒वध्व॑म् । मह॑ते । क्ष॒त्राय॑ । मह॑ते । आ॒धिप॑त्यायेत्याधि॒-प॑त्याय ।  
 मह॑ते । जा॒नरा॑ज्यायेति जा॒न-रा॑ज्याय । ए॒षः । वः । भ॒रताः॑ । राजा॑ ।  
 सोमः॑ । अ॒स्माक॑म् । ब्रा॒ह्मणा॑नाम् । राजा॑ । प्र॒तीति॑ । त्यत् । नाम॑ ।  
 रा॒ज्यम् । अ॒धायि॑ । स्वा॒म् । त॒नुव॑म् । वरु॑णः । अ॒शि॒श्रेत् । शु॒चैः ।  
 मि॒त्रस्य॑ । व॒त्याः । अ॒भू॒म । अ॒मन्म॑हि । मह॑तः । ऋ॒तस्य॑ । नाम॑ ।  
 स॒र्वे । व्रा॑ताः ( ) । वरु॑णस्य । अ॒भू॒वन् । वी॒ति । मि॒त्र । ए॒वैः ।  
 अ॒राति॑म् । अ॒ता॒रीत् । अ॒सूषु॑दन्त । य॒ज्ञियाः॑ । ऋ॒तेन॑ । वी॒ति । उ ।  
 त्रि॒तः । ज॒रिमा॑णम् । नः । आ॒नट् । वि॒ष्णोः॑ । क्र॒मः । अ॒सि ।  
 वि॒ष्णोः॑ । क्रा॒न्तम् । अ॒सि । वि॒ष्णोः॑ । वि॒क्रान्त॑मि॒ति वि॒ – क्रा॒न्तम् ।  
 अ॒सि । 19 (75) (प॒शूनां-व्रा॑ताः-पञ्च॑विं॒शतिश्च॑) (A10)

**1.8.11.1**

अ॒र्थे॒तः॑ स्था॒ऽपां॑ पति॒रसि॑ वृ॒षा॒स्यूर्मि॑ वृ॒षसे॑नो॒ऽसि॑ व्रज॒क्षितः॑ स्थ  
म॒रुता॑मो॒जः स्थ॑ सूर्य॑वर्च॒सः स्थ॑ सूर्य॑त्वच॒सः स्थ॑ मा॒न्दाः॑ स्थ  
वा॒शाः स्थ॑ श॒क्वरीः॑ स्थ॑ वि॒श्वभृ॑तः स्थ॑ ज॒नभृ॑तः स्था  
ऽग्ने॑स्ते॒जस्याः॑ स्था ऽपामो॑षधी॒ना र॑सः स्थाऽपो  
दे॒वीर्मधु॑मती॒रगृ॑ह्ण॒न्नूर्ज॑स्वती॒ राज॑सूयाय॒ चितानाः॑ ।  
याभि॑ मि॒त्राव॑रुणाव॒भ्यषि॑ञ्चन् या॒भिरि॑द्रम॒नय॑न्नत्य ( ) रा॒तीः ।  
राष्ट्र॑दाः स्थ॑ रा॒ष्ट्रं द॑त्त स्वाहा॑ राष्ट्र॑दाः स्थ॑ रा॒ष्ट्रम॑मु॒ष्मै द॑त्त । 20

**1.8.11.1 (Padam)**

अ॒र्थे॒त इत्य॑र्थ-इतः । स्थ । अ॒पाम् । पतिः॑ । अ॒सि । वृ॒षा । अ॒सि ।  
ऊ॒र्मिः । वृ॒षसे॑न इति॑ वृष-से॒नः । अ॒सि । व्रज॑क्षित इति॑  
व्रज-क्षि॑तः । स्थ । म॒रुता॑म् । ओ॒जः । स्थ । सूर्य॑वर्च॒स इति॑  
सूर्य॑ - वर्च॒सः । स्थ । सूर्य॑त्वच॒स इति॑ सूर्य॑ - त्वच॒सः । स्थ ।  
मा॒न्दाः । स्थ । वा॒शाः । स्थ । श॒क्वरीः॑ । स्थ । वि॒श्वभृ॑त इति॑  
वि॒श्व - भृ॑तः । स्थ । ज॒नभृ॑त इति॑ ज॒न-भृ॑तः । स्थ । अ॒ग्नेः ।

ते॒ज॒स्याः॑ । स्थ । अ॒पाम् । ओष॑धीनाम् । र॒सः । स्थ । अ॒पः ।  
 दे॒वीः । मधु॑मतीरिति मधु – म॒तीः । अ॒गृह्ण॑न् । ऊ॒र्ज॒स्वतीः॑ ।  
 रा॒ज॒सूया॑येति राज – सूयाय । चि॒तानाः॑ । याभिः॑ । मि॒त्राव॑रुणाविति  
 मि॒त्रा – व॑रुणौ । अ॒भ्यषि॑ञ्चन्नित्यभि-अ॒सिञ्च॑न् । याभिः॑ । इ॒द्रम् ।  
 अ॒नय॑न् । अ॒तीति॑ ( ) । अ॒रातीः॑ । रा॒ष्ट्र॒दा इति॑ रा॒ष्ट्र-दाः॑ । स्थ ।  
 रा॒ष्ट्रम् । द॒त्त । स्वा॒हा । रा॒ष्ट्र॒दा इति॑ रा॒ष्ट्र – दाः॑ । स्थ । रा॒ष्ट्रम् ।  
 अ॒मुष्मै॑ । द॒त्त । 20 (61) (अ॒त्ये-का॑दश च) (A11)

### 1.8.12.1

दे॒वीरा॑पः सं मधु॑मतीर्मधु॑मतीभिः सृ॒ज्यध्वं॑ म॒हि व॑र्चः क्ष॒त्रिया॑य  
 व॒न्वाना॑ अ॒नाधृ॑ष्टाः सी॒दतो॑र्ज॒स्वतीर्म॑हि व॑र्चः क्ष॒त्रिया॑य  
 द॒धती॑रनिभृष्टम॒सि वा॒चो ब॑न्धुस्तपो॒जाः सोम॑स्य दा॒त्रम॑सिशु॒क्रा वः॑  
 शु॒क्रेणो॑त् पु॒नामि॑ च॒न्द्राश्च॑न्द्रेणामृ॒ता अ॒मृते॑न स्वा॒हा रा॒ज॒सूया॑य  
 चि॒तानाः॑ । स॒धमा॑दो द्यु॒म्निनी॑रूर्ज ए॒ता अ॒निभृ॑ष्टा अ॒पस्यु॑वो  
 व॒सानः॑ । प॒स्त्या॑सु च॒क्रे व॑रुणः स॒धस्थ॑मपा॒ञ् शिशु॑ – [ ] 21

**1.8.12.1 (Padam)**

दे॒वीः । आ॒पः । स॒मि॒ति॒ । म॒धु॒म॒ती॒रि॒ति॒ म॒धु॒- म॒तीः । म॒धु॒म॒ती॒भि॒रि॒ति॒  
म॒धु॒ - म॒ती॒भिः । सृ॒ज्य॒ध्व॒म् । म॒हि॒ । व॒र्चः । क्ष॒त्रि॒या॒य । व॒न्वा॒नाः ।  
अ॒ना॒धृ॒ष्टा॒ इत्य॒ना॒-धृ॒ष्टाः । सी॒द॒त॒ । ऊ॒र्ज॒स्व॒तीः । म॒हि॒ । व॒र्चः ।  
क्ष॒त्रि॒या॒य । द॒ध॒तीः । अ॒नि॒भृ॒ष्ट॒मि॒य॒नि॒-भृ॒ष्ट॒म् । अ॒सि॒ । वा॒चः ।  
ब॒न्धुः । त॒पो॒जा॒ इति॒ तपः॑ - जाः । सो॒म॒स्य॒ । दा॒त्र॒म् । अ॒सि॒ ।  
शु॒क्राः । वः । शु॒क्रे॒ण॒ । उ॒दि॒ति॒ । पु॒ना॒मि॒ । च॒न्द्राः । च॒न्द्रे॒ण॒ ।  
अ॒मृ॒ताः । अ॒मृ॒ते॒न॒ । स्वा॒हा॒ । रा॒ज॒सू॒या॒ये॒ति॒ रा॒ज॒ - सू॒या॒य॒ ।  
चि॒ता॒नाः । स॒ध॒मा॒द॒ इति॒ स॒ध॒-मा॒दः । द्यु॒म्नि॒नीः । ऊ॒र्जः॑ । ए॒ताः ।  
अ॒नि॒भृ॒ष्टा॒ इत्य॒नि॒-भृ॒ष्टाः । अ॒प॒स्यु॒वः॑ । व॒सा॒नः । प॒स्त्या॒सु॒ । च॒क्रे॒ ।  
व॒रु॒णः । स॒ध॒स्थ॒मि॒ति॒ स॒ध॒ - स्थ॒म् । अ॒पा॒म् । शि॒शुः । 21 (50)

**1.8.12.2**

मा॒तृ॒त॒-मा॒स्व॒न्तः॑ । क्ष॒त्र॒स्यो॒ल्ब॒म॒सि॒ क्ष॒त्र॒स्य॒ यो॒नि॒र॒स्या॒वि॒न्नो॒  
अ॒ग्नि॒ र्गृ॒ह॒प॒ति॒रा॒वि॒न्न॒ इन्द्रो॑ वृ॒द्ध॒श्र॒वा॒ आ॒वि॒न्नः॑ पू॒षा॒ वि॒श्व॒वे॒दा॒  
आ॒वि॒न्नौ॑ मि॒त्रा॒व॒रु॒णा॒ वृ॒ता॒वृ॒धा॒वा॒वि॒न्ने॒ द्या॒वा॒पृ॒थि॒वी॒ धृ॒त॒व्र॒ते॒ आ॒वि॒न्ना॒

दे॒व्य-दि॒ति वि॒श्वरू॒प्यावि॒न्नो ऽय॒मसा॒वामु॒ष्याय॒णो॒ऽस्यां वि॒श्यस्मिन्  
रा॒ष्ट्रे म॒हते॑ क्ष॒त्राय॑ म॒हत आ॒धिप॒त्याय॑ म॒हते॑ जा॒नरा॒ज्यायै॑ष वो॒ भर॒ता  
रा॒जा सो॒मो॒ऽस्माकं॑ ब्रा॒ह्मणा॒नां॒ राजेन्द्र॑स्य - [ ] 22

**1.8.12.2 (Padam)**

मा॒तृ॒तमा॒स्विति॑ मा॒तृ - त॒मासु॑ । अ॒न्तः । क्ष॒त्रस्य॑ । उ॒ल्बम् । अ॒सि ।  
क्ष॒त्रस्य॑ । यो॒निः । अ॒सि । आ॒वि॒न्नः । अ॒ग्निः । गृ॒हप॒तिरिति॑  
गृ॒ह-प॒तिः । आ॒वि॒न्नः । इन्द्रः॑ । वृ॒द्धश्र॑वा इति॑ वृ॒द्ध-श्र॑वाः ।  
आ॒वि॒न्नः । पू॒षा । वि॒श्ववे॑दा इति॑ वि॒श्व - वे॒दाः ।  
आ॒वि॒न्नौ । मि॒त्राव॑रुणा॒विति॑ मि॒त्रा - व॑रुणौ । ऋ॒तावृ॑धा॒वित्यृ॑त-वृ॒धौ ।  
आ॒वि॒न्ने इति॑ । द्या॒वापृ॑थि॒वी इति॑ द्या॒वा - पृ॑थि॒वी । धृ॒तव्र॑ते इति॑  
धृ॒त - व्र॑ते । आ॒वि॒न्ना । दे॒वी । अ॒दि॒तिः । वि॒श्वरू॒पीति॑ वि॒श्व-रू॒पी ।  
आ॒वि॒न्नः । अ॒यम् । अ॒सौ । आ॒मु॒ष्याय॒णः । अ॒स्याम् । वि॒शि ।  
अ॒स्मिन् । रा॒ष्ट्रे । म॒हते॑ । क्ष॒त्राय॑ । म॒हते॑ ।  
आ॒धिप॒त्याये॒त्याधि॑-प॒त्याय॑ । म॒हते॑ । जा॒नरा॒ज्याये॒ति जा॒न-रा॒ज्याय॑ ।  
ए॒षः । वः॑ । भ॒रताः॑ । रा॒जा । सो॒मः । अ॒स्माक॑म् । ब्रा॒ह्मणा॒नाम् ।

राजा । इन्द्रस्य । 22 (50)

**1.8.12.3**

वज्रो॑ऽसि॑ वार्त्र॑घ्नस्त्वया॑ यं वृ॑त्रं व॑ध्याच्छत्रु॑बाध॑नाः स्थ॑पात॑ मा॑  
प्रत्य॑ञ्चं पात॑ मा॑ तिर्य॑ञ्चमन्व॑ञ्चं मा॑ पात॑ दिग्भ्यो॑ मा॑ पात॑ विश्वा॑भ्यो॑  
मा॑ नाष्ट्रा॑भ्यः पात॑ हिरण्य॑वर्णा-वुष॑सां वि॒रोके॑ऽयः स्थू॑णा-वुदि॑तौ  
सूर्य॑स्याऽऽ रो॑हतं व॑रुण॑ मि॒त्र ग॑र्तं तत॑श्चक्षा॑थामदि॑तिं दि॒तिं च । 23

**1.8.12.3 (Padam)**

वज्रः । असि । वार्त्रघ्न इति वार्त्र – घ्नः । त्वया । अयम् । वृत्रम् ।  
वध्यात् । शत्रुबाधना इति शत्रु-बाधनाः । स्थ । पात । मा ।  
प्रत्यञ्चम् । पात । मा । तिर्यञ्चम् । अन्वञ्चम् । मा । पात ।  
दिग्भ्य इति दिक्-भ्यः । मा । पात । विश्वाभ्यः । मा । नाष्ट्राभ्यः ।  
पात । हिरण्यवर्णाविति हिरण्य – वर्णौ । उषसाम् । विरोक इति  
वि – रोके । अयः स्थूणाविययः – स्थूणौ । उदितावियुत् – इतौ ।  
सूर्यस्य । एति । रोहतम् । वरुण । मित्र । गर्तम् । ततः ।  
चक्षाथाम् । अदितिम् । दितिम् । च । 23 (41)



(शिशु-रिन्द्रस्यै-कचत्वारिंशच्च) (A12)

**1.8.13.1**

स॒मि॒ध॒मा ति॒ष्ठ गाय॒त्री त्वा छन्द॑सामवतु त्रिवृ॑थस्तोमो रथ॑न्तरं  
सामा॒ग्निर्दे॒वता ब्र॒ह्म द्र॒विणमु॒ग्रामा ति॒ष्ठ त्रि॒ष्टुप् त्वा छन्द॑सामवतु  
पञ्च॑दशस्तोमो बृ॒हत्सामेन्द्रो दे॒वता क्ष॒त्रं द्र॒विणं वि॒राज॑मा ति॒ष्ठ  
जग॑ती त्वा छन्द॑सामवतु सप्त॑दशस्तोमो वैरू॒पं साम॑ मरु॒तो दे॒वता  
वि॒ड् द्र॒विण-मु॒दीची॒मा-ति॒ष्ठानु॒ष्टुप् त्वा - [ ] 24

**1.8.13.1 (Padam)**

स॒मि॒ध॒मि॒ति सं-इ॒धम् । ए॒ति । ति॒ष्ठ । गाय॒त्री । त्वा । छन्द॑साम् ।  
अ॒वतु॑ । त्रि॒वृदि॑ति त्रि-वृत् । स्तो॒मः । रथ॑न्तरमि॒ति रथं-तर॑म् ।  
साम॑ । अ॒ग्निः । दे॒वता । ब्र॒ह्म । द्र॒विणम् । उ॒ग्राम् । ए॒ति । ति॒ष्ठ ।  
त्रि॒ष्टुप् । त्वा । छन्द॑साम् । अ॒वतु॑ । पञ्च॑दश इति पञ्च-दशः ।  
स्तो॒मः । बृ॒हत् । साम॑ । इन्द्रः । दे॒वता । क्ष॒त्रम् । द्र॒विणम् ।  
वि॒राज॑मि॒ति वि-राज॑म् । ए॒ति । ति॒ष्ठ । जग॑ती । त्वा । छन्द॑साम् ।  
अ॒वतु॑ । सप्त॑दश इति सप्त-दशः । स्तो॒मः । वैरू॒पम् । साम॑ ।

म॒रुतः॑ । दे॒वता॑ ॥ विट् । द्र॒विण॑म् । उ॒दी॒चीम् । ए॒ति । तिष्ठ॑ ।

अनु॒ष्टु॒बित्य॑नु – स्तुप् । त्वा । 24 (50)

### 1.8.13.2

छन्द॑सामव॒त्वेक॑वि॒ंशः॑ स्तोमो॑ वैराज॑ साम॑ मि॒त्रावरु॑णौ  
दे॒वता॑ ब॒लं द्र॒विण॑-मू॒र्ध्वा॒मा तिष्ठ॑ प॒ङ्क्ति॑स्त्वा छन्द॑सामवतु  
त्रि॒णव॑त्रयस्त्रि॒ंशौ स्तोमो॑ शा॒क्वर॑रैवते साम॑नी बृ॒हस्प॑तिर्दे॒वता॑ वर्चो॑  
द्र॒विण॑-मी॒दृङ् चा॒न्यादृङ् चै॒तादृङ् च॑ प्र॒ति॒दृङ् च॑ मि॒तश्च॑ सं॒मितश्च॑  
स॒भराः॑ । शु॒क्रज्यो॑तिश्च चि॒त्रज्यो॑तिश्च स॒त्यज्यो॑तिश्च ज्यो॑तिष्मा॒ञ्च  
स॒त्यश्च॑र्त॒पाश्च॑ – [ ] 25

### 1.8.13.2 (Padam)

छन्द॑साम् । अ॒वतु॑ । ए॒कवि॒ंश इ॒त्येक॑-वि॒ंशः॑ । स्तोमः॑ ।  
वैरा॑जम् । साम॑ । मि॒त्रावरु॑णा॒विति॑ मि॒त्रा – वरु॑णौ । दे॒वता॑ । ब॒लम् ।  
द्र॒विण॑म् । ऊ॒र्ध्वा॒म् । ए॒ति । तिष्ठ॑ । प॒ङ्क्तिः॑ । त्वा । छन्द॑साम् । अ॒वतु॑ ।  
त्रि॒णव॑त्रयस्त्रि॒ंशा॒विति॑ त्रि॒णव॑ – त्रय॑स्त्रि॒ंशौ । स्तोमो॑ ।  
शा॒क्वर॑रैवते इति शा॒क्वर॑-रैवते । साम॑नी इति । बृ॒हस्प॑तिः ।

दे॒वता॑ । वर्चः॑ । द्र॒वि॒णम् । ई॒दृ॒ङ् । च । अ॒न्या॒दृ॒ङ् । च । ए॒ता॒दृ॒ङ् ।  
च । प्र॒ति॒दृ॒डि॒ति॑ प्र॒ति – दृ॒ङ् । च । मि॒तः । च । सं॒मि॒त इति॑  
सं – मि॒तः । च । स॒भ॒रा इति॑ स – भ॒राः । शु॒क्र॒ज्यो॒ति॒रिति॑  
शु॒क्र – ज्यो॒तिः । च । चि॒त्र॒ज्यो॒ति॒रिति॑ चि॒त्र – ज्यो॒तिः । च ।  
स॒त्य॒ज्यो॒ति॒रिति॑ स॒त्य – ज्यो॒तिः । च । ज्यो॒ति॒ष्मा॒न् । च । स॒त्यः ।  
च । ऋ॒त॒पा इत्यृ॒त – पाः । च । 25 (50)

### 1.8.13.3

ऽत्य॑ ॐ हाः । अ॒ग्नये॑ स्वा॒हा सो॒माय॑ स्वा॒हा स॒वि॒त्रे स्वा॒हा स॒र॒स्व॒त्यै  
स्वा॒हा पू॒ष्णे स्वा॒हा बृ॒ह॒स्प॒तये॑ स्वा॒हे॒न्द्राय॑ स्वा॒हा घो॒षाय॑ स्वा॒हा  
श॒लो॒काय॑ स्वा॒हा ऽ॒शाय॑ स्वा॒हा भ॒गाय॑ स्वा॒हा क्षे॒त्र॒स्य॑ प॒तये॑ स्वा॒हा  
पृ॒थि॒व्यै स्वा॒हा ऽन्त॑रि॒क्षाय॑ स्वा॒हा दि॒वे स्वा॒हा सू॒र्याय॑ स्वा॒हा  
च॒न्द्र॒म॒से स्वा॒हा नक्ष॑त्रे॒भ्यः स्वा॒हा ऽद्भ्यः॑ स्वा॒हौष॑धी॒भ्यः स्वा॒हा  
व॒न॒स्प॒ति॒भ्यः स्वा॒हा च॒रा॒च॒रे॒भ्यः स्वा॒हा प॒रि॒प्ल॒वे॒भ्यः स्वा॒हा  
स॒री॒सृ॒पे॒भ्यः स्वा॒हा ॥ 26

**1.8.13.3 (Padam)**

अ॒त्य॒हा॒ इत्य॑ति-अ॒हाः॑ । अ॒ग्नये॑ ॥ स्वा॒हा ॥ सो॒माय॑ ॥ स्वा॒हा ॥  
 स॒वि॒त्रे ॥ स्वा॒हा ॥ स॒रस्व॑त्यै ॥ स्वा॒हा ॥ पू॒ष्णे ॥ स्वा॒हा ॥ बृ॒हस्प॑तये ।  
 स्वा॒हा ॥ इ॒न्द्राय॑ ॥ स्वा॒हा ॥ घो॒षाय॑ ॥ स्वा॒हा ॥ श्लो॒काय॑ ॥ स्वा॒हा ॥  
 अ॒शा॒य ॥ स्वा॒हा ॥ भ॒गाय॑ ॥ स्वा॒हा ॥ क्षे॒त्रस्य॑ ॥ प॒तये॑ ॥ स्वा॒हा ॥  
 पृ॒थि॒व्यै ॥ स्वा॒हा ॥ अ॒न्तरि॑क्षाय ॥ स्वा॒हा ॥ दि॒वे ॥ स्वा॒हा ॥ सू॒र्याय॑ ॥  
 स्वा॒हा ॥ च॒न्द्रम॑से ॥ स्वा॒हा ॥ नक्ष॑त्रेभ्यः ॥ स्वा॒हा ॥  
 अ॒द्भ्य इत्य॑त्-भ्यः ॥ स्वा॒हा ॥ ओष॑धीभ्य इत्योष॑धि-भ्यः ॥ स्वा॒हा ॥  
 व॒नस्प॑तिभ्य इति व॒नस्प॑ति-भ्यः ॥ स्वा॒हा ॥ च॒राच॑रेभ्यः ॥ स्वा॒हा ॥  
 प॒रिप्ल॑वेभ्य इति प॒रि - प्ल॑वेभ्यः ॥ स्वा॒हा ॥ स॒रीसृ॑पेभ्यः ।  
 स्वा॒हा ( ) । 26 (50) (अ॒नुष्टु॑प्-त॒पाश्च॑ - स॒रीसृ॑पेभ्यः स्वा॒हा)

(A13)

**1.8.14.1**

सो॒मस्य॑ त्वि॒षिर॑सि त॒वे॒व मे॒ त्वि॒षि॑र्भूया-द॒मृ॒तम॑सि मृ॒त्योर्मा॑ पा॒हि  
 दि॒द्योन्मा॑ पा॒ह्यवे॑ष्टा द॒न्दशू॑का नि॒रस्तं॑ नमु॒चेः शि॑रः ।  
 सो॒मो रा॒जा व॑रु॒णो दे॒वा ध॑र्म॒सुव॑श्च ये । ते ते वाच॑

सुवन्तां ते ते प्राणं सुवन्तां ते ते चक्षुः सुवन्तां ते ते  
श्रोत्रं सुवन्तां सोमस्य त्वा द्युम्नेनाभि षिञ्चाम्यग्ने – [ ] 27

**1.8.14.1 (Padam)**

सोमस्य । त्विषिः । असि । तव । इव । मे । त्विषिः । भूयात् ।  
अमृतम् । असि । मृत्योः । मा । पाहि । दिद्योत् । मा । पाहि ।  
अवेष्टा इत्यव-इष्टाः । दन्दशूकाः । निरस्तमिति निः-अस्तम् ।  
नमुचेः । शिरः । सोमः । राजा । वरुणः । देवाः ।  
धर्मसुव इति धर्म – सुवः । च । ये । ते । ते । वाचम् । सुवन्ताम् ।  
ते । ते । प्राणमिति प्र-अनम् । सुवन्ताम् । ते । ते । चक्षुः ।  
सुवन्ताम् । ते । ते । श्रोत्रम् । सुवन्ताम् । सोमस्य । त्वा । द्युम्नेन ।  
अभीति । सिञ्चामि । अग्नेः । 27 (50)

**1.8.14.2**

स्तेजसा सूर्यस्य वर्चसेन्द्रस्येन्द्रियेण मित्रावरुणयोर्वीर्येण  
मरुतामोजसा क्षत्राणां क्षत्रपतिरस्यति दिवस्पाहि  
समाव-वृत्र-धरागुदी-चीरहिं बुध्नियमनु संचरन्तीस्ताः

पर्व॑तस्य॒ वृष॑भस्य॒ पृ॒ष्ठे नाव॑श्चरन्ति॒ स्वसि॑च॒ इया॒नाः ।  
 रु॒द्र यत्ते॒ क्रयी॒ परं॒ नाम॒ तस्मै॑ हु॒तम॑सि॒ यमै॑ष्टमसि ।  
 प्रजा॑पते॒ न त्वदे॒तान्य॒न्यो विश्वा॑ जा॒तानि॒ परि॒ ता ( ) ब॑भूव ।  
 यत्का॑मास्ते॒ जुहु॑मस्तन्नो॒ अस्तु॒ वय॑ꣳ स्या॒म पत॑यो रयी॒णाम् । 28

**1.8.14.2 (Padam)**

तेज॑सा । सूर्य॑स्य । वर्च॑सा । इन्द्र॑स्य । इन्द्रि॑येण । मि॒त्रावरु॑णयोरिति॒  
 मि॒त्रा – वरु॑णयोः । वीर्ये॑ण । मरु॑ताम् । ओज॑सा । क्ष॒त्राणाम् ।  
 क्ष॒त्रप॑तिरिति॒ क्ष॒त्र – प॑तिः । अ॒सि । अ॒तीति॑ । दि॒वः । पा॒हि ।  
 स॒माव॑वृ॒त्रन्निति॑ सं – आ॒ववृ॒त्रन् । अध॑राक् । उ॒दीचीः । अ॒हिम् ।  
 बु॒ध्निय॑म् । अ॒न्विति॑ । स॒ञ्चर॑न्तीरिति॒ सं-च॑रन्तीः । ताः । पर्व॑तस्य ।  
 वृष॑भस्य । पृ॒ष्ठे । नावः॑ । च॒रन्ति॑ । स्व॒सिच॑ इति॒ स्व-सि॑चः ।  
 इया॒नाः । रु॒द्र । यत् । ते । क्रयी॑ । पर॑म् । नाम॑ । तस्मै॑ । हु॒तम् ।  
 अ॒सि । यमै॑ष्टमिति॒ यम॑ – इ॒ष्टम् । अ॒सि । प्रजा॑पत इति॒  
 प्रजा॑-प॒ते । न । त्वत् । ए॒तानि॑ । अ॒न्यः । विश्वा॑ । जा॒तानि॑ । प॒रीति॑ ।  
 ता ( ) । ब॒भूव॑ । यत्का॑मा इति॒ यत् – का॒माः । ते । जुहु॑मः । तत् ।

नः । अस्तु । वयम् । स्याम । पतयः । रयीणाम् । 28 (61)

(अग्ने-स्तै-कादश च) (A14)

### 1.8.15.1

इन्द्रस्य वज्रोऽसि वार्त्रघ्नस्त्वयाऽयं वृत्रं वध्यान्  
मित्रावरुणयोस्त्वा प्रशास्त्रोः प्रशिषा युनज्मि यज्ञस्य योगेन  
विष्णोः क्रमोऽसि विष्णोः क्रान्तमसि विष्णोर्विक्रान्तमसि मरुतां  
प्रसवे जेषमाप्तं मनः समहमिन्द्रियेण वीर्येण पशूनां मन्युरसि तवेव  
मे मन्युर्भूयान्नमो मात्रे पृथिव्यै माहं मातरं पृथिवीं  
हिंसिषं मा – [ ] 29

### 1.8.15.1 (Padam)

इन्द्रस्य । वज्रः । असि । वार्त्रघ्न इति वार्त्र-घ्नः । त्वया । अयम् ।  
वृत्रम् । वध्यात् । मित्रावरुणयोरिति मित्रा – वरुणयोः । त्वा ।  
प्रशास्त्रोरिति प्र-शास्त्रोः । प्रशिषेति प्र-शिषा । युनज्मि । यज्ञस्य ।  
योगेन । विष्णोः । क्रमः । असि । विष्णोः । क्रान्तम् । असि ।  
विष्णोः । विक्रान्तमिति वि – क्रान्तम् । असि । मरुताम् ।

प्र॒स॒व इति॑ प्र – स॒वे । जेष॑म् । आ॒प्तम् । म॒नः । स॒मि॒ति । अ॒हम् ।  
 इ॒न्द्रि॒येण॑ । वी॒र्ये॑ण । प॒शूना॑म् । म॒न्युः । अ॒सि । त॒व । इ॒व । मे॒ ।  
 म॒न्युः । भू॒यात् । न॒मः । मा॒त्रे । पृ॒थि॒व्यै । मा । अ॒हम् । मा॒तर॑म् ।  
 पृ॒थि॒वीम् । हि॒॒सि॒षम् । मा । 29 (50)

### 1.8.15.2

मां मा॒ता पृ॒थि॒वी हि॒॒सी-दि॒य॒द॒स्या-यु॒र॒स्यायु॑र्मे धे॒ह्यूर्ग॒स्यूर्जं॑ मे  
 धे॒हि यु॒ङ्क्षि॑ व॒र्चो॑ऽसि व॒र्चो॑ म॒यि धे॒ह्य॒ग्नये॑ गृ॒हप॑तये स्वाहा सोमा॒य  
 व॒नस्प॑तये स्वाहे॒न्द्रस्य॑ ब॒लाय॑ स्वाहा म॒रुता॑मोजसे स्वाहा ह॒॒सः  
 शु॒चिष॑द् व॒सु॒रन्त॑रि॒क्ष-स॒द्धो॒ता वे॒दिष॑दतिथि दु॒रोण॑सत् । नृ॒षद्  
 व॒रस॑दृ॒तस॑द् व्यो॒मस॑द॒ब्जा गो॒जा ऋ॒तजा॑ ( )  
 अ॒द्रि॒जा ऋ॒तं-बृ॒हत् । 30

### 1.8.15.2 (Padam)

मा॒म् । मा॒ता । पृ॒थि॒वी । हि॒॒सीत् । इ॒यत् । अ॒सि । आ॒युः । अ॒सि ।  
 आ॒युः । मे॒ । धे॒हि । ऊ॒र्क् । अ॒सि । ऊ॒र्जम् । मे॒ । धे॒हि । यु॒ङ् ।  
 अ॒सि । व॒र्चः । अ॒सि । व॒र्चः । म॒यि । धे॒हि । अ॒ग्नये॑ ।



गृ॒ह॒प॒त॒य॒ इति॑ गृ॒ह॒-प॒त॒ये॒ । स्वा॒हा॒ ॥ सो॒मा॒य॒ । व॒न॒स्प॒त॒ये॒ । स्वा॒हा॒ ॥  
 इ॒न्द्र॒स्य॒ । ब॒ला॒य॒ । स्वा॒हा॒ ॥ म॒रु॒ता॒म् । ओ॒ज॒से॒ । स्वा॒हा॒ ॥ ह॒॒सः॒ ।  
 शु॒चि॒ष॒दि॒ति॑ शु॒चि॒ - स॒त् । व॒सुः॒ । अ॒न्त॒रि॒क्ष॒दि॒त्य॒न्त॒रि॒क्ष॒ - स॒त् ।  
 हो॒ता॒ ॥ वे॒दि॒ष॒दि॒ति॑ वे॒दि॒ - स॒त् । अ॒ति॒थिः॒ । दु॒रो॒ण॒स॒दि॒ति॑  
 दु॒रो॒ण॒ - स॒त् । नृ॒ष॒दि॒ति॑ नृ॒ - स॒त् । व॒र॒स॒दि॒ति॑ व॒र॒ - स॒त् ।  
 ऋ॒त॒स॒दि॒त्यृ॒त॒ - स॒त् । व्यो॒म॒स॒दि॒ति॑ व्यो॒म॒ - स॒त् । अ॒ब्जा  
 इ॒त्य॒प् - जाः॒ । गो॒जा इति॑ गो॒ - जाः॒ । ऋ॒त॒जा इ॒त्यृ॒त॒-जाः॒ ( ) ।  
 अ॒द्रि॒जा इ॒त्य॒द्रि॒ - जाः॒ । ऋ॒तं॒ । बृ॒ह॒त् । 30 (53)

(हि॒॒सि॒षं॒ म-॒र्त॒जा-स्त्री॒णि॒ च) (A15)

### 1.8.16.1

मि॒त्रो॒ऽसि॒ व॒रु॒णो॒ऽसि॒ स॒म॒हं॒ वि॒श्वै॒र्दे॒वैः॒ क्ष॒त्र॒स्य॒ ना॒भि॒र॒सि॒ क्ष॒त्र॒स्य॒  
 यो॒नि॒र॒सि॒ स्यो॒ना॒मा सी॒द सु॒ष॒दा॒मा सी॒द मा॒ त्वा हि॒॒ सी॒न्मा मा॒  
 हि॒॒सी॒न्नि॒ ष॒सा॒द धृ॒त॒व्र॒तो व॒रु॒णः॒ प॒स्त्या॒स्वा सा॒म्रा॒ज्या॒य सु॒क्र॒तु  
 ब्र॒ह्मा॒(३) न्त्व॒॒ राज॒न् ब्र॒ह्मा॒ऽसि॒ स॒वि॒ता॒ऽसि॒ स॒त्य॒स॒वो ब्र॒ह्मा॒(३)न्  
 त्व॒॒ राज॒न् ब्र॒ह्मा॒ऽसी॒न्द्रो॒ऽसि॒ स॒त्यौ॒जा - [ ] 31

**1.8.16.1 (Padam)**

मि॒त्रः । अ॒सि॒ । व॒रु॒णः । अ॒सि॒ । स॒मि॒ति॒ । अ॒हम् । वि॒श्वैः॑ । दे॒वैः ।  
क्ष॒त्र॒स्य॑ । ना॒भिः । अ॒सि॒ । क्ष॒त्र॒स्य॑ । यो॒निः । अ॒सि॒ । स्यो॒नाम् ।  
ए॒ति॒ । सी॒द॒ । सु॒ष॒दा॒मि॒ति॒ सु – स॒दा॒म् । ए॒ति॒ । सी॒द॒ । मा । त्वा ।  
हि॒॒सी॒त् । मा । मा । हि॒॒सी॒त् । नी॒ति॒ । स॒सा॒द॒ । धृ॒त॒व्र॒त॒ इति॑  
धृ॒त॒ – व्र॒तः । व॒रु॒णः । प॒स्त्या॒सु । ए॒ति॒ । सा॒म्रा॒ज्या॒येति॑  
सां-रा॒ज्या॒य॒ । सु॒क्र॒तु॒रि॒ति॒ सु- क्र॒तुः । ब्र॒ह्मा(३)न् । त्वम् । रा॒ज॒न् ।  
ब्र॒ह्मा । अ॒सि॒ । स॒वि॒ता । अ॒सि॒ । स॒त्य॒स॒व॒ इति॑ स॒त्य॒ – स॒वः ।  
ब्र॒ह्मा(३)न् । त्वम् । रा॒ज॒न् । ब्र॒ह्मा । अ॒सि॒ । इ॒न्द्रः । अ॒सि॒ ।  
स॒त्यौ॒जा॒ इति॑ स॒त्य॒ – औ॒जाः । 31 (50)

**1.8.16.2**

ब्र॒ह्मा(३)न् त्व॒ राज॒न् ब्र॒ह्मा॒सि॑ मि॒त्रो॒सि॑ सु॒शे॒वो ब्र॒ह्मा(३)न् त्व॒  
रा॒ज॒न् ब्र॒ह्मा॒सि॑ व॒रु॒णो॒सि॑ स॒त्य॒ध॒र्मे॒न्द्र॒स्य॑ व॒ज्रो॒सि॑ वा॒र्त्र॒घ्न॒स्तेन॑  
मे र॒ध्य॒ दि॒शो॒भ्य॒य॒ राजा॒भू॒त् सु॒श्लो॒काँ(४) सु॒म॒ङ्ग॒लाँ(४)  
स॒त्य॒रा॒जा(३)न् । अ॒पां न॒प्त्रे॒ स्वा॒हो॒ र्जो॒ न॒प्त्रे॒ स्वा॒हा॒ग्नये॑

गृ॒ह॒प॒त॒ये॒ स्वा॒हा॑ । 32

**1.8.16.2 (Padam)**

ब्र॒ह्मा॑(३)न् । त्वम् । रा॒ज॒न् । ब्र॒ह्मा॑ । अ॒सि॒ । मि॒त्रः॑ । अ॒सि॒ । सु॒शे॒व॒  
इति॑ सु – शे॒वः॑ । ब्र॒ह्मा॑(३)न् । त्वम् । रा॒ज॒न् । ब्र॒ह्मा॑ । अ॒सि॒ ।  
व॒रु॒णः॑ । अ॒सि॒ । स॒त्य॒ध॒र्मे॑ति स॒त्य – ध॒र्मा॑ । इ॒न्द्र॒स्य॑ । व॒ज्रः॑ ।  
अ॒सि॒ । वा॒र॒त्र॒घ्न॒ इति॑ वा॒र॒त्र – घ्नः॑ । ते॒न॑ । मे॒ । र॒थ्य॑ । दि॒शः॑ ।  
अ॒भी॒ति॑ । अ॒यम् । रा॒जा॑ । अ॒भू॒त् । सु॒श॒लो॒काँ(४)॑ इति॑  
सु – श॒लो॒काँ(४)॑ । सु॒म॒ङ्ग॒लाँ(४)॑ इति॑ सु – म॒ङ्ग॒लाँ(४)॑ ।  
स॒त्य॒रा॒जा(३)॑नि॒ति स॒त्य – रा॒जा(३)॑न् । अ॒पाम् । न॒प्त्रे॑ । स्वा॒हा॑ ।  
ऊ॒र्जः॑ । न॒प्त्रे॑ । स्वा॒हा॑ । अ॒ग्नये॑ । गृ॒ह॒प॒त॒य॑ इति॑ गृ॒ह – प॒त॒ये॑ ।  
स्वा॒हा॑ । 32 (40) (स॒त्यौ॒जा – श्र॒त्वा॒रि॒ञ्च॑ ) (A16)

**1.8.17.1**

आ॒ग्ने॒य॒म॒ष्टा॒क॒पा॒लं॑ निर्व॑पति॒ हि॒र॒ण्यं॑ दक्षि॒णा सार॑स्व॒तं च॒रुं॑  
व॒थ्स॑त॒री दक्षि॒णा सा॒वि॒त्रं द्वा॒द॒श॒क॒पा॒ल – मु॒प॒ध्व॒स्तो दक्षि॒णा पौ॒ष्णं॑  
च॒रुञ् श्या॒मो दक्षि॒णा बा॒र्ह॒स्प॒त्यं च॒रुञ् शि॒ति॒पृ॒ष्ठो

दक्षिणैन्द्र-मेकादशकपालमृषभो दक्षिणा वारुणं दशकपालं  
महानिरष्टो दक्षिणा सौम्यं चरुं बभ्रुर्दक्षिणा त्वाष्ट्रमष्टाकपालं  
शुण्ठो दक्षिणा वैष्णवं त्रिकपालं वामनो दक्षिणा । 33

**1.8.17.1 (Padam)**

आग्नेयम् । अष्टाकपालमित्यष्टा-कपालम् । निरिति । वपति ।  
हिरण्यम् । दक्षिणा । सारस्वतम् । चरुम् । वथ्सतरी । दक्षिणा ।  
सावित्रम् । द्वादशकपालमिति द्वादश - कपालम् । उपध्वस्त  
इत्युप - ध्वस्तः । दक्षिणा । पौष्णम् । चरुम् । श्यामः । दक्षिणा ।  
बार्हस्पत्यम् । चरुम् । शितिपृष्ठ इति शिति - पृष्ठः । दक्षिणा ।  
ऐन्द्रम् । एकादशकपालमित्येकादश-कपालम् । ऋषभः । दक्षिणा ।  
वारुणम् । दशकपालमिति दश - कपालम् । महानिरष्ट इति  
महा-निरष्टः । दक्षिणा । सौम्यम् । चरुम् । बभ्रुः । दक्षिणा ।  
त्वाष्ट्रम् । अष्टाकपालमित्यष्टा - कपालम् । शुण्ठः । दक्षिणा ।  
वैष्णवम् । त्रिकपालमिति त्रि - कपालम् । वामनः ।  
दक्षिणा । 33 (42)

(आग्नेयं हिरण्यं सारस्वतं-द्विचत्वारिंशत् ) (A17)

**1.8.18.1**

सद्यो दीक्षयन्ति सद्यः सोमं क्रीणन्ति पुण्डरिस्रजां प्रयच्छति  
दशभिर्वथ्सतरैः सोमं क्रीणाति दशपेयो भवति शतं ब्राह्मणाः  
पिबन्ति सप्तदशं स्तोत्रं भवति प्राकाशावध्वर्यवे ददाति  
स्रजमुद्गात्रे रुक्मं होत्रेऽश्वं प्रस्तोतृप्रतिहर्तृभ्यांद्वादश पष्ठौही ब्रह्मणे  
वशां मैत्रावरुणायर्षभं ब्राह्मणाच्छंसिने वाससी नैष्टापोतृभ्यां  
स्थूरि यवाचितमच्छावाकाया नड्वाहमग्नीधे भार्गवो होता भवति  
श्रायन्तीयं ब्रह्मसामं भवति वारवन्तीयं ( ) मग्निष्टोमसामं  
सारस्वतीरपो गृह्णाति । 34

**1.8.18.1 (Padam)**

सद्यः । दीक्षयन्ति । सद्यः । सोमम् । क्रीणन्ति । पुण्डरिस्रजाम् ।  
प्रेति । यच्छति । दशभिरिति दश-भिः । वथ्सतरैः । सोमम् ।  
क्रीणाति । दशपेय इति दश-पेयः । भवति । शतम् । ब्राह्मणाः ।  
पिबन्ति । सप्तदशमिति सप्त – दशम् । स्तोत्रम् । भवति ।

प्रा॒काशौ । अध्व॑र्यवे॒ । ददा॑ति । स्रज॑म् । उ॒द्गात्र॑ इत्यु॒त्-गा॒त्रे ।  
रु॒क्मम् । हो॒त्रे । अ॒श्वम् । प्र॒स्तो॒तृप्र॑ति॒हर्तृ॑भ्यामि॒ति  
प्र॒स्तो॒तृप्र॑ति॒हर्तृ॑-भ्यां । द्वा॒दश॑ । प॒ष्ठौहीः । ब्र॒ह्म॒णो॑ । व॒शाम् ।  
मै॒त्राव॑रुणायेति॑ मै॒त्रा - व॑रुणा॒य । ऋ॒षभ॑म् । ब्रा॒ह्म॒णाच्छ॑स्मि॒ने॑ ।  
वा॒ससी॑ इति॑ । ने॒ष्टापो॑तृभ्यामि॒ति ने॒ष्टापो॑तृ - भ्याम् । स्थू॒रि ।  
यवा॑चितमि॒ति यव॑ - आ॒चितम् । अ॒च्छावा॑का॒य । अन॑ड्वा॒हम् ।  
अ॒ग्नी॒ध इत्य॑ग्नि - इ॒धे॑ । भा॒र्गवः॑ । हो॒ता । भव॑ति । श्रा॒यन्ती॑यम् ।  
ब्र॒ह्म॒साम॑मि॒ति ब्र॒ह्म - सा॒मम् । भव॑ति । वा॒रव॑न्ती॒यमि॒ति  
वा॒र - व॑न्ती॒यम् ( ) । अ॒ग्नि॒ष्टोम॑सा॒ममि॒त्यग्नि॑ष्टोम - सा॒मम् ।  
सा॒रस्व॑तीः । अ॒पः । गृ॒ह्णा॒ति । 34 (54)

(वा॒रव॑न्ती॒यं च॑त्वा॒रि च) (A18)

### 1.8.19.1

आ॒ग्ने॒यम॑ष्टाक॒पालं॑ निर्व॑पति॒ हिर॑ण्यं दक्षि॒णैन्द्र॑-मे॒काद॑शक॒पालमृ॑षभो  
दक्षि॑णा वैश्वदे॒वं च॒रुं पि॒शङ्गी॑ प॒ष्ठौही॑ दक्षि॒णामै॒त्राव॑रुणी॒मामि॑क्षां व॒शा  
दक्षि॑णा बा॒र्हस्प॑त्यं च॒रुं शि॑तिपृ॒ष्ठो दक्षि॑णाऽऽदि॒त्यां म॒ल्हां

ग॒र्भिणी॑मा ल॒भते॑ मा॒रुतीं॑ पृ॒श्निं॑ प॒ष्ठौही॑मश्चि॒भ्यां॑ पू॒ष्णो पु॒रोडा॑शं  
 द्वा॒दश॑कपा॒लं निर्व॑पति सर॒स्वते॑ स॒त्यवा॑चे च॒रुं स॒वित्रे॑ स॒त्य  
 प्र॒सवा॑य पु॒रोडा॑शं द्वा॒दश॑कपा॒लं ति॒सृध॑न्व॒ं शु॒ष्कदृ॑ति र्दक्षि॒णा । 35

**1.8.19.1 (Padam)**

आ॒ग्नेय॑म् । अ॒ष्टाक॑पा॒लमि॒त्यष्टा॑-क॒पा॒लम् । नि॒रिति॑ । व॒पति॑ ।  
 हि॒र॒ण्यम् । दक्षि॑णा । ऐ॒न्द्रम् । ए॒काद॑शकपा॒लमि॒त्येका॑दश-क॒पा॒लम् ।  
 ऋ॒षभः॑ । दक्षि॑णा । वै॒श्वदे॑वमि॒ति वै॒श्व-दे॒वम् । च॒रुम् । पि॒शङ्गी॑ ।  
 प॒ष्ठौही॑ । दक्षि॑णा । मै॒त्राव॑रु॒णीमि॒ति मै॒त्रा-व॑रु॒णीम् । आ॒मि॒क्षा॑म् ।  
 व॒शा । दक्षि॑णा । बा॒र्ह॒स्प॒त्यम् । च॒रुम् । शि॒तिपृ॑ष्ठ इति  
 शि॒ति-पृ॑ष्ठः । दक्षि॑णा । आ॒दि॒त्याम् । म॒ल्हाम् । ग॒र्भिणी॑म् । ए॒ति ।  
 ल॒भते॑ । मा॒रुती॑म् । पृ॒श्निम् । प॒ष्ठौही॑म् । अ॒श्चि॒भ्यामि॒त्यश्चि॑-भ्याम् ।  
 पू॒ष्णो । पु॒रोडा॑शम् । द्वा॒दश॑कपा॒लमि॒ति द्वा॒दश - क॒पा॒लम् । नि॒रिति॑ ।  
 व॒पति॑ । सर॒स्वते॑ । स॒त्यवा॑च इति स॒त्य - वा॑चे । च॒रुम् । स॒वित्रे॑ ।  
 स॒त्यप्र॑सवा॒येति॑ स॒त्य - प्र॑सवा॒य । पु॒रोडा॑शम् । द्वा॒दश॑कपा॒लमि॒ति  
 द्वा॒दश - क॒पा॒लम् । ति॒सृध॑न्वमि॒ति ति॒सृ - ध॑न्वम् ।

शुष्क॑दृतिरिति॑ शुष्क – दृतिः॑ । दक्षिणा॑ । 35 (47)

(अग्नेय॑ हिरण्यमै॑द्रमृष॑भो वै॑श्वदे॒वं पि॒शङ्गी॑

बार्हस्पत्य॑-सप्तच॑त्वारि॒ंशत्) (A19)

### 1.8.20.1

आग्नेयम॑ष्टाक॑पालं॒ निर्व॑पति सौम्यं॒ चरुं॑ सावि॑त्रं द्वा॒दश॑कपालं  
बार्हस्पत्यं॑ चरुं॒ त्वाष्ट्र॑म॒ष्टाक॑पालं॒ वैश्वान॑रं द्वा॒दश॑कपालं॒ दक्षि॑णो रथ  
वाहन॑वाहो दक्षि॑णा सार॒स्वतं॑ चरुं॒ निर्व॑पति पौ॒ष्णं चरुं॑ मै॒त्रं चरुं॑  
वारु॑णं चरुं॒ क्षैत्र॑पत्यं॒ चरु॑मादित्यं॒ चरु॑मुत्त॒रो रथ॑वाहन॒वाहो॑  
दक्षि॑णा । 36

### 1.8.20.1 (Padam)

आग्ने॑यम् । अ॒ष्टाक॑पालमि॒त्य॒ष्टा-क॑पालम् । निरि॑ति । व॒पति॑ ।  
सौम्य॑म् । च॒रुम् । सा॒वि॒त्रम् । द्वा॒दश॑कपालमि॒ति द्वा॒दश-क॑पालम् ।  
बार्ह॑स्पत्यम् । च॒रुम् । त्वाष्ट्र॑म् । अ॒ष्टाक॑पालमि॒त्य॒ष्टा - क॑पालम् ।  
वैश्वान॑रम् । द्वा॒दश॑कपालमि॒ति द्वा॒दश - क॑पालम् । दक्षि॑णः ।  
रथ॑वाहन॒वाह इति॑ रथवाहन-वाहः । दक्षि॑णा । सार॒स्वतम् । च॒रुम् ।



निरिति॑ । व॒पति॑ । पौ॒ष्णम् । च॒रुम् । मै॒त्रम् । च॒रुम् । वा॒रुणम् ।  
च॒रुम् । क्षै॒त्रप॒त्यमि॑ति क्षै॒त्र – प॒त्यम् । च॒रुम् । आ॒दि॒त्यम् । च॒रुम् ।  
उत्तर॑ इत्युत् – तरः । रथ॑वाहनवाह इति रथवाहन – वाहः ।

दक्षिणा । 36 (34)

(आ॒ग्ने॒यꣳ सौ॒म्यं बा॒र्हस्प॒त्यं-चतु॑स्त्रिंशत्) (A20)

**1.8.21.1**

स्वा॒द्वीं त्वा॑ स्वा॒दुना॑ ती॒व्रां ती॒व्रेणा॑मृताममृतेन सृ॒जामि॑ सꣳसो॒मेन॑  
सो॒मोऽस्य॑श्चि॒भ्यां प॑च्यस्व सरस्वत्यै पच्यस्वेन्द्राय सु॒त्राम्णो॑ पच्यस्व  
पुना॑तु ते परि॒स्रुतꣳ सो॒मꣳ सूर्य॑स्य दुहिता । वा॒रेण॑ शश्वता तना॑ ।  
वा॒युः पू॒तः प॒वित्रे॑ण प्रत्यङ् खसो॒मो अति॑द्रुतः । इन्द्र॑स्य यु॒ज्यः  
सखा॑ । कु॒विद॑ङ्ग यवमन्तो॑ यवं चि॒द्यथा॑ दान्त्यनुपूर्वं वि॒यूय॑ ।  
इहे॑हैषां कृणुत भोजनानि ( ) ये ब॒र्हिषो॑ नमो॒वृक्तिं॑ न जग्मुः ।  
आ॒श्विनं॑ धू॒म्रमा॑ लभते सारस्वतं मेषमैन्द्रमृषभ-मैन्द्र-  
मे॒काद॑शकपालं निर्वपति सावित्रं द्वादशकपालं वा॒रुणं॑ दश कपालꣳ  
सो॒मप्र॑तीकाः पितरस्तृष्णुत॑ वड॒बा दक्षिणा॑ । 37

**1.8.21.1 (Padam)**

स्वा॒द्वीम् । त्वा॒ । स्वा॒दुना॑ ॥ ती॒व्राम् । ती॒व्रेण॑ । अ॒मृता॑म् । अ॒मृते॑न ।  
 सृ॒जामि॑ । स॒मिति॑ । सो॒मेन॑ । सो॒मः । अ॒सि ।  
 अ॒श्विभ्या॑मित्य॒श्वि-भ्या॑म् । प॒च्यस्व॑ । स॒रस्व॑त्यै । प॒च्यस्व॑ ।  
 इन्द्रा॑य । सु॒त्राण॑ इति॒ सु - त्रा॑णे ॥ प॒च्यस्व॑ । पु॒नातु॑ । ते ।  
 परि॒स्रुत॑मिति॒ परि - सु॑तम् । सो॒मम् । सूर्य॑स्य । दु॒हिता॑ । वा॒रेण॑ ।  
 श॒श्वता॑ । तना॑ । वा॒युः । पू॒तः । प॒वित्रे॑ण । प्र॒त्यङ् । सो॒मः । अ॒तिद्रु॑त  
 इत्य॑ति - द्रु॒तः । इन्द्र॑स्य । यु॒ज्यः । सखा॑ । कु॒वित् । अ॒ङ्ग ।  
 यव॑मन्त॒ इति॑ यव॒-मन्तः॑ । यव॑म् । चि॒त् । यथा॑ । दा॒न्ति ।  
 अ॒नुपूर्व॑मित्य॒नु - पूर्व॑म् । वि॒यूये॑ति वि - यू॒य । इ॒हेहे॑ती॒ह - इ॒ह ।  
 ए॒षाम् । कृ॒णुत॑ । भो॒जनानि॑ ( ) । ये । ब॒र्हिषः॑ । नमो॑वृ॒क्तिमि॑ति  
 नमः॑ - वृ॒क्तिम् । न । ज॒ग्मुः । आ॒श्विन॑म् । धू॒म्रम् । ए॒ति । ल॒भते॑ ।  
 सा॒रस्व॑तम् । मे॒षम् । ऐ॒न्द्रम् । ऋ॒षभ॑म् । ऐ॒न्द्रम् ।  
 ए॒काद॑शक॒पाल॑मित्ये॒काद॑श-क॒पाल॑म् । नि॒रिति॑ । व॒पति॑ । सा॒वित्र॑म् ।  
 द्वा॒दश॑क॒पाल॑मिति॒ द्वा॒दश - क॒पाल॑म् । वा॒रुण॑म् ।

द॒श॒क॒पा॒ल॒मि॒ति॒ द॒श॒ – क॒पा॒ल॒म् । सो॒म॒प्र॒ती॒का इति॒  
 सो॒म॒ – प्र॒ती॒काः । पि॒तरः॑ । तृ॒ष्णु॒त । वड॑बा । दक्षि॑णा । 37 (76)  
 (भो॑ज॒नानि॑-षड्वि॒ंशति॑श्च) (A21)

**1.8.22.1**

अ॒ग्ना॒वि॒ष्णू॒ म॒हि॒ तद्वा॑ म॒हि॒त्वं॑ वी॒तं॑ घृ॒तस्य॑ गु॒ह्यानि॑ नाम॑ ।  
 दमे॑दमे॑ स॒प्त रत्ना॑ दधा॒ना प्र॒ति वां॑ जि॒ह्वा घृ॒तमा॑ च॒रण्ये॑त् ।  
 अ॒ग्ना॒वि॒ष्णू॒ म॒हि॒ धाम॑ प्रि॒यं वां॑ वी॒थो॑ घृ॒तस्य॑ गु॒ह्या जुषा॑णा ।  
 दमे॑दमे॑ सु॒ष्टुती॑र्वावृ॒धाना॑ प्र॒ति वां॑ जि॒ह्वा घृ॒तमु॑च्च॒रण्ये॑त् ।  
 प्र॒णो दे॒वी सर॑स्वती॒ वाजे॑भिर्वा॒जिनी॑वती । धी॒नाम॑वि॒त्र्यव॑तु ।  
 आ नो॑ दि॒वो बृ॒हतः॑ – [ ] 38

**1.8.22.1 (Padam)**

अ॒ग्ना॒वि॒ष्णू॒ इत्य॑ग्ना – वि॒ष्णू॒ । म॒हि॒ । तत् । वा॒म् । म॒हि॒त्त्वमि॑ति॒  
 म॒हि॒ – त्वम् । वी॒तम् । घृ॒तस्य॑ । गु॒ह्यानि॑ । नाम॑ । दमे॑दम॒ इति॒  
 दमे॑-दमे॑ । स॒प्त । रत्ना॑ । दधा॒ना । प्र॒तीति॑ । वा॒म् । जि॒ह्वा । घृ॒तम् ।  
 ए॒ति॒ । च॒रण्ये॑त् । अ॒ग्ना॒वि॒ष्णू॒ इत्य॑ग्ना-वि॒ष्णू॒ । म॒हि॒ । धाम॑ ।

प्रि॒यम् । वा॒म् । वी॒थः । घृ॒तस्य॑ । गु॒ह्या॑ । जु॒षा॒णा । द॒मे॒द॒म॒ इति॑  
द॒मे॒ – द॒मे॒ । सु॒ष्टु॒ती॒रिति॑ सु॒-स्तु॒तीः । वा॒वृ॒धा॒ना । प्र॒ती॒ति॒ । वा॒म् ।  
जि॒ह्वा । घृ॒तम् । उ॒दि॒ति॒ । च॒र॒ण्ये॒त् । प्र॒ति॒ । नः॑ । दे॒वी । सर॑स्वती ।  
वा॒जे॒भिः । वा॒जिनी॑वतीति॑ वा॒जिनी॑ – व॒ती॒ । धी॒नाम् । अ॒वि॒त्रि॒ ।  
अ॒व॒तु॒ । ए॒ति॒ । नः॑ । दि॒वः । बृ॒ह॒तः । 38 (50)

### 1.8.22.2

प॒र्व॒ता॒दा सर॑स्वती य॒ज॒ता ग॑न्तु य॒ज्ञं । ह॒वं दे॒वी जु॒जुषा॑णा घृ॒ताची॑  
श॒ग्मां नो॑ वा॒चमु॑शती शृ॒णोतु॑ । बृ॒ह॒स्प॒ते जु॒ष॒स्व नो॑ ह॒व्यानि॑ विश्वदे॒व्य ।  
रा॒स्व र॒त्नानि॑ दा॒शुषे॑ । ए॒वा पि॒त्रे विश्व॑दे॒वाय॑ वृ॒ष्णे य॒ज्ञैर्वि॑धेम  
न॒म॒सा ह॒वि॒र्भिः । बृ॒ह॒स्प॒ते सु॒प्र॒जा वी॒र॒व॒न्तो व॒य॒ꣳ स्या॑म प॒तयो॑  
र॒यी॒णां बृ॒ह॒स्प॒ते अ॒ति य॒द॒र्यो अ॒र्॒हाद्दु॒म॒द्वि॒भाति॑ क॒र्तु॒म॒ज्जने॑षु ।  
य॒द्दी॒द-य॒च्छ॒व॒स- [ ] 39

### 1.8.22.2 (Padam)

प॒र्व॒ता॒त् । ए॒ति॒ । सर॑स्वती । य॒ज॒ता । ग॑न्तु । य॒ज्ञम् । ह॒वम् । दे॒वी ।  
जु॒जुषा॑णा । घृ॒ताची॑ । श॒ग्मा॒म् । नः॑ । वा॒चम् । उ॒श॒ती । शृ॒णो॒तु॒ ।

बृ॒हस्प॑ते । जु॒षस्व॑ । नः । ह॒व्यानि॑ । वि॒श्वदे॑व्येति वि॒श्व-दे॒व्य ।  
 रास्व॑ । रत्नानि॑ । दा॒शुषे॑ ॥ ए॒वा । पि॒त्रे । वि॒श्वदे॑वायेति वि॒श्व-दे॒वाय ।  
 वृ॒ष्णे ॥ य॒ज्ञैः । वि॒धेम॑ । नम॑सा । ह॒विर्भिरि॑ति ह॒विः – भिः॑ ।  
 बृ॒हस्प॑ते । सु॒प्रजा॑ इति सु – प्र॒जाः । वी॒रव॑न्त इति वी॒र – व॑न्तः ।  
 वय॑म् । स्या॑म । पत॑यः । रयी॑णाम् । बृ॒हस्प॑ते । अती॑ति । यत् ।  
 अ॒र्यः । अ॒र्हात् । द्यु॒मदि॑ति द्यु – मत् । वि॒भाती॑ति वि – भा॑ति ।  
 क्र॒तुम॑दि॒ति क्र॒तु – मत् । जने॑षु । यत् । दी॒दय॑त् । श॒वसाः॑ । 39 (50)

### 1.8.22.3

त॒प्रजा॑त तद॒स्मासु॑ द्रवि॑णं धेहि चि॒त्रं ।  
 आ नो॑ मि॒त्रावरु॑णा घृ॒तैर्गव्यू॑तिमुक्ष॑तं । म॒ध्वा रजा॑सि सु॒क्रतू॑ ।  
 प्र॒बाह॑वा सि॒सृतं॑ जी॒वसे॑ न आ नो॑ गव्यू॑ति मुक्ष॑तं घृ॒तेन॑ ।  
 आ नो॑ जने॑ श्रव॑यतं यु॒वाना॑ श्रु॒तं मे॑ मि॒त्रावरु॑णा ह॒वेमा॑ ।  
 अ॒ग्निं वः॑ पू॒र्व्य गिरा॑ दे॒वमी॑डे व॒सूनां॑ ।  
 स॒पर्य॑न्तः पु॒रुप्रि॑यं मि॒त्रं न क्षे॑त्रसा॒धसं॑ ।  
 म॒क्षू दे॒वव॑तो रथः – [ ] 40

**1.8.22.3 (Padam)**

ऋ॒त॒प्र॒जा॒ते॒त्यृ॒त-प्र॒जा॒त । तत् । अ॒स्मा॒सु । द्र॒वि॒णम् । धे॒हि ।  
चि॒त्रम् । ए॒ति । नः । मि॒त्रा॒व॒रु॒णे॒ति मि॒त्रा-व॒रु॒णा । घृ॒तैः । ग॒व्यू॒तिम् ।  
उ॒क्ष॒तम् । म॒ध्वा । र॒जा॒सि । सु॒क्र॒तू इति सु - क्र॒तू । प्रे॒ति ।  
बा॒ह॒वा । सि॒सृ॒तम् । जी॒व॒से । नः । ए॒ति । नः । ग॒व्यू॒तिम् ।  
उ॒क्ष॒तम् । घृ॒ते॒न । ए॒ति । नः । ज॒ने । श्र॒व॒य॒तम् । यु॒वा॒ना । श्रु॒तम् ।  
मे । मि॒त्रा॒व॒रु॒णे॒ति मि॒त्रा - व॒रु॒णा । ह॒वा । इ॒मा । अ॒ग्निम् । वः ।  
पू॒र्व्यम् । गि॒रा । दे॒वम् । ई॒डे । व॒सू॒नाम् । स॒पर्य॒न्तः । पु॒रु॒प्रि॒य॒मि॒ति  
पु॒रु-प्रि॒यम् । मि॒त्रम् । न । क्षे॒त्र॒सा॒ध॒स॒मि॒ति क्षे॒त्र - सा॒ध॒सम् ।  
म॒क्षु । दे॒व॒व॒त इति दे॒व - व॒तः । रथः । 40 (50)

**1.8.22.4**

शू॒रो वा पृ॒थ्सु का॒सु चि॒त् । दे॒वा॒नां यँ इ॒न्म॒नो य॒ज॒मा॒न  
इ॒य॒क्ष॒त्य॒भी॒द॒य॒ज्व॒नो भु॒वत् । न य॒ज॒मा॒न रि॒ष्य॒सि न सु॒न्वा॒न न दे॒व॒यो ।  
अ॒स॒द॒न्न सु॒वी॒र्य॒मु॒त त्य॒दाश्च॒श्चि॒यं । न॒कि॒ष्टं क॒र्म॒णा न॒श॒न्न प्र॒यो॒ष॒न्न  
यो॒ष॒ति । उप॒ क्ष॒र॒न्ति सि॒न्ध॒वो म॒यो॒भु॒व ई॒जा॒नं च य॒क्ष्य॒मा॒णं च

धे॒नवः॑ । पृ॒णन्तं॑ च प॒पु॒रिं च – [ ] 41

**1.8.22.4 (Padam)**

शू॒रः । वा । पृ॒थि॒स्वति॑ पृ॒त्-सु॑ । का॒सु॑ । चि॒त् । दे॒वाना॑म् । यः ।  
 इ॒त् । म॒नः । य॒ज॒मा॒नः । इ॒यक्ष॑ति । अ॒भी॒ति॑ । इ॒त् । अ॒य॒ज्व॒नः ।  
 भु॒वत् । न । य॒ज॒मा॒न । रि॒ष्य॒सि॑ । न । सु॒न्वा॒न । न । दे॒वयो॑ इति॑  
 दे॒व-यो॑ । अ॒सत् । अ॒त्र । सु॒वी॒र्य॒मि॒ति॑ सु – वी॒र्य॑म् । उ॒त । त॒यत् ।  
 आ॒श्व॒श्चि॒य॒मि॒त्याशु॑-अ॒श्चि॒य॒म् । न॒किः॑ । त॒म् । क॒र्म॒णा॑ । न॒श॒त् । न ।  
 प्रे॒ति॑ । यो॒षत् । न । यो॒ष॒ति॑ । उ॒पे॒ति॑ । क्ष॒र॒न्ति॑ । सि॒न्ध॒वः॑ । म॒यो॒भु॒व॒  
 इति॑ म॒यः – भु॒वः । ई॒जा॒न॒म् । च । य॒क्ष्य॑माणम् । च । धे॒नवः॑ ।  
 पृ॒णन्त॑म् । च । प॒पु॒रि॒म् । च । 41 (50)

**1.8.22.5**

श्र॒व॒स्य॒वो॑ घृ॒त॒स्य॒ धा॒रा॒ उ॒प॒य॒न्ति॑ वि॒श्व॒तः॑ । सो॒मा॒रु॒द्रा॑ वि॒वृ॒ह॒तं॑  
 वि॒षू॒ची॒म॒मी॒वा॒ या॒ नो॒ ग॒य॒मा॒वि॒वेष॑ । आ॒रे॒ बा॒धे॒थां॑ नि॒र्ऋ॒तिं॑ प॒रा॒चैः॑  
 कृ॒तं चि॒दे॒नः॑ प्र॒मु॒मु॒क्त॒म॒स्म॒त् । सो॒मा॒रु॒द्रा॑ यु॒व॒मे॒ता॒न्य॒स्मो॑ वि॒श्वा॒ त॒नू॒षु॑  
 भेष॒जा॒नि॒ ध॒त्तं॑ । अ॒व॒स्य॒तं॑ मु॒ञ्च॒तं॑ य॒न्त्रो॑ अ॒स्ति॒ त॒नू॒षु॑ ब॒द्धं॑ कृ॒त॒मे॒नो॑

अ॒स्मत् । सो॒मा॒पू॒ष॒णा॒ ज॒न॒ना॒ र॒यी॒णां॑ ज॒न॒ना॒ दि॒वो॑ ज॒न॒ना॒ ( )  
 पृ॒थि॒व्याः । जा॒तौ॑ वि॒श्व॒स्य॑ भु॒व॒न॒स्य॑ गो॒पौ दे॒वा अ॒कृ॒ण्व॒न्न॒मृ॒त॒स्य॑  
 ना॒भिं॑ । इ॒मौ दे॒वौ जा॒य॒मा॒नौ जु॒ष॒न्ते॒मौ त॒माँ॒सि गू॒ह॒ता॒म॒जु॒ष्टा ।  
 आ॒भ्या॒मि॒न्द्रः प॒क्व॒मा॒मा॒स्व॒न्तः सो॒मा॒पू॒ष॒भ्यां॑ ज॒न॒दु॒स्त्रि॒या॒सु । 42

**1.8.22.5 (Padam)**

श्र॒व॒स्य॒वः । घृ॒त॒स्य॑ । धा॒राः । उ॒पे॒ति॑ । य॒न्ति॑ । वि॒श्व॒तः । सो॒मा॒रु॒द्रे॒ति॑  
 सो॒मा-रु॒द्रा । वी॒ति॑ । वृ॒ह॒त॒म् । वि॒षू॒ची॒म् । अ॒मी॒वा । या । नः ।  
 ग॒य॒म् । आ॒वि॒वै॒शे॒त्या - वि॒वै॒श । आ॒रे । बा॒धे॒था॒म् । निर्॒ऋ॒ति॒मि॒ति॑  
 निः - ऋ॒ति॒म् । प॒रा॒चैः । कृ॒त॒म् । चि॒त् । ए॒नः । प्रे॒ति॑ । मु॒मु॒क्त॒म् ।  
 अ॒स्मत् । सो॒मा॒रु॒द्रे॒ति॑ सो॒मा - रु॒द्रा । यु॒व॒म् । ए॒ता॒नि॑ । अ॒स्मे इ॒ति॑ ।  
 वि॒श्वा॑ । त॒नू॒षु । भे॒ष॒जा॒नि॑ । ध॒त्त॒म् । अ॒वे॒ति॑ । स्य॒त॒म् । मु॒ञ्च॒त॒म् ।  
 य॒त् । नः । अ॒स्ति॑ । त॒नू॒षु । ब॒द्ध॒म् । कृ॒त॒म् । ए॒नः । अ॒स्मत् ।  
 सो॒मा॒पू॒ष॒णे॒ति॑ सो॒मा - पू॒ष॒णा । ज॒न॒ना । र॒यी॒णा॒म् । ज॒न॒ना । दि॒वः ।  
 ज॒न॒ना॒ ( ) । पृ॒थि॒व्याः । जा॒तौ॑ । वि॒श्व॒स्य॑ । भु॒व॒न॒स्य॑ । गो॒पौ ।  
 दे॒वाः । अ॒कृ॒ण्व॒न् । अ॒मृ॒त॒स्य॑ । ना॒भि॒म् । इ॒मौ । दे॒वौ । जा॒य॒मा॒नौ ।



जुषन्त॑ । इ॒मौ । तमा॑सि । गू॒ह॒ताम् । अ॒जु॒ष्टा । आ॒भ्याम् । इन्द्रः॑ ।  
प॒क्वम् । आ॒मा॒सु । अ॒न्तः । सो॒मा॒पू॒ष॒भ्यामि॑ति सो॒मा॒पू॒ष – भ्याम् ।  
ज॒नत् । उ॒स्रि॒या॒सु । 42 (75)

(बृ॒ह॒तः-श॒व॒सा-र॒थः-प॒पु॒रिं च-दि॒वो ज॒न॒ना-प॒ञ्च॒विं॒श॒तिश्च)  
(A22)

**Prasna Korvai with starting Padams of 1 to 22 Anuvaakams :-**

अ॒नु॒म॒त्या-आ॒ग्ने॒य-मै॒न्द्रा॒ग्न-म॒ग्नये॑-सो॒मा॒य-प्र॒ति॒पू॒रु॒ष-मै॒न्द्रा॒ग्नं-  
धा॒त्रे – बा॒र्ह॒स्प॒त्य-म॒ग्नये॑-ऽर्था॒तो-दे॒वीः-स॒मि॒ध-सो॒म॒स्ये-  
न्द्र॒स्य – मि॒त्र-आ॒ग्ने॒य-स॒द्य-आ॒ग्ने॒य-मा॒ग्ने॒य-स्वा॒द्वीं त्वा-  
ऽग्ना॒वि॒ष्णू-द्वा॒विं॒श॒तिः । )

**Korvai with starting Padams of 1, 11, 21 Series of Panchaatis :-**

(अ॒नु॒म॒त्यै-य॒था॒ऽस॒ति-दे॒वी॒रा॒पो-मि॒त्रो॒ऽसि॒-शू॒रो वा-  
द्वि॒च॒त्वा॒रिं॒श॒त् । )

**First and Last Padam of Eighth Prasnam :-**

(अ॒नु॒म॒त्या-उ॒स्रि॒या॒सु । )

**Kanda Korvai with starting Padams of Eight Prasnas of Kandam 1 :-**

(इष-आपो-देवस्या-ऽऽ ददे-देवासुराः-सं त्वा-पाकयज्ञ-  
मनुमत्यै ।)

॥ हरिः ओं ॥

॥ कृष्ण यजुर्वेदीय तैत्तिरीय संहितायां प्रथमकाण्डे पद पाठे

अष्टमः प्रश्नः समाप्तः ॥

॥ इति प्रथमं काण्डं ॥

---

**Details of Panchati and Padam for Kandam 1 – Prasanam 8 – TS 1.8**

	Panchati	Padams
Anuvakam 1	2	84
Anuvakam 2	1	18
Anuvakam 3	1	70
Anuvakam 4	2	80
Anuvakam 5	3	144
Anuvakam 6	2	103
Anuvakam 7	2	95
Anuvakam 8	1	58
Anuvakam 9	3	133
Anuvakam 10	2	125
Anuvakam 11	1	61
Anuvakam 12	3	141
Anuvakam 13	3	150
Anuvakam 14	2	111
Anuvakam 15	2	103
Anuvakam 16	2	90
Anuvakam 17	1	42
Anuvakam 18	1	54

Anuvakam 19	1	47
Anuvakam 20	1	34
Anuvakam 21	1	76
Anuvakam 22	5	275
Total →	42	2094

**Notes:**

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site “[www.vedavms.in](http://www.vedavms.in)”